


# Kan Ram



Mizoram State Library  
DG2304



**MZ954.166**  
**SAI**


*By*  
**Lalzama Sailo**  
**&**  
**Brig. Ngurliana**



# KAN RAM

*By*  
**Lalzama Sailo**  
**&**  
**Brig. Ngurliana**

Mizoram State Library  
DC2304



*Published by Brig. Ngurliana and Printed at the Gosen  
Press, Aizawl. Copies — 1000.*

INDIAN STATE LIBRARY

No. 89-2304

Acq. by \_\_\_\_\_

Class by \_\_\_\_\_

Date by \_\_\_\_\_

Sub Head \_\_\_\_\_

Transcribed by \_\_\_\_\_

\_\_\_\_\_

## THUHMAHRUAI

He lehkhahu (KAN RAM) kan buatsaihna chhan ber chu - Sailo lai Lallula thlahte chanchin leh, keini Lallianvunga thlahte chanchin hi Mizo History-ah a pawimawh ema kan briat avang leh, chutianga hnam tana thil pawimawh si chu kan tu leh fa, thangthar zelten an hre lo vang tih kan blauh vang a ni ber a.

Kan upate leh hman lai chanchin brette an boral zo mai dawna kan briat avangin kum 1957 vel atang khan an thu briatte chu kan ziaik tan a. Chanchin thenkhatte erawh hi chu kan Mizo History lo ziaik hmasatute hnen atanga kan briatte an ni a; tin, sawrkar lam lehkhahu atang pawhin thil thenkhat briat belh kan nei nual bawh. Chuvangin he lehkhahua chanchin kan ziaike hi chu a dik thawkhat ble ang.

Hetianga lehkhahua chhuah theih a nih theih-na tura min tanpuitute zawng zawng chungah lawm thu kan sawi a. Tlawmgaih chhuaha min lo chhut saktu Gosen Press neitu Pu Vanlalchhuanga chungah lawm thu kan sawi bawh a ni.

Brig. Ngurliana (Retired)  
The Salvation Army  
Venghouai, Aizawl  
20. Feb. 1987

Lalzama Sailo  
Ex-Chief of  
Sawlung & Darlawn.

## A CHHUNGA THU AWMTE

<i>Bung</i>	<i>Thupui</i>	<i>Phek</i>
1.	Sailo lai thlahtu bul chhuina	1
2.	Lallula fate chanchin	4
	Sailo laiho inbiakhona hmasa	7
	Lallula fate inbiakhona	9
3.	Lallianvunga thlahte chanchin	18
4.	Vanpuilala chanchin	25
5.	Lalhleia lo lai tan dan	41
6.	Puma zai lo chhuah tan dan	56
7.	Lalhleia chanchin dangte	60
8.	Lalhleia fate chanchin	70

## BUNG KHATNA SAILO LAL THLAHTU BUL CHHUINA

Lallianvunga leh a thlahte churchin kan sawi hmam Sairo lalte inthlah chhawn dan chu kan Mizo History zaktuten hetinga hlâ hian an chhui thei a ni.

1. Chinlunga fate. : Chawngthua leh Chawngzaa.
2. Chawngthua fate : Chawngvawna (Nova an ti bawk) leh Ralhlaha
3. Chawngvawna fate : Dongula leh Thahdova
4. Dongula fa : Niguitea
5. Niguitea fate : Bawklua (Sihsinga anti bawk) leh Ngeknaguka
6. Bawklua fa : Ralnaa
7. Ralnaa fa : Chhuahlawma
8. Chhuahlawma fa : Zahmuaka

Hetih lai hian Khawrua leh Tlangkhuaa Hnamteho lal Thlanpiala a thi a, lal an nei ta lo va, Sihpuikhura mite chu lal atan an han sawm a, tumahin an lo duh lo va, "Paruala te chhung sawm rawh u" an lo tih san mai a, tichuan Zahmuaka te nupa chu an va sawn ta a ni. Buhchhun leh sachhiah eia lal tura sawm an ni a, hei bi kum 1500 vel lai kha nia rin a ni. Ti, hei bi "Sairo lal tanna" ti pawhin

sawi ila a dik thei bawh ang. Heta tang bian an lalna chu tawp hauh lovin April 1955 kha a thleng a ni. Kum 455 chhung an lai a nih chu.

9. Zahmuaka fate : Zadenga, Paliana, Thangluaha, Rivunga, Rokhuma, Thangura te an ni. Mipa pasarih an pianga, a nau-pang ber crawh chu a thi a ni.

Zahmuaka fate hi Run leh Tiau inkara an awm laiin, khaw brang neiin an lai hman theuh tawh a, kum 1720 leh 1730 inkerah khan Tiau an rawn kân thla ve ta a ni.

10. Thangura fate : Chawnglula leh Thangmanga  
 11. Thangmanga fa : Sailova  
 12. Sailova fate : Chungnunga, Cheakuala Lienlula  
 13. Chungnunga fate : Lalhluma, Rohnaa, Lalchera, Thangphunga  
 14. Rohnaa fa : Lallula  
 15. Lallula fate : Lalpuiliana, Lallianvunga, Lalmanga, Vuta.



Lallula fate unau pali tangrual bian Mizoram bmar lam hi chu an nek zau ta zel a, thil dang zawng zawng ai pawhin an unau inthurual zel theihna hi an chakna ber a ni. An khawtlang enkawltu leh roreltu upa fang fel tak tak an nei theuh va, tin, mi huaissen leh mi tlawmgai nula tlangval zingah pawh an nei theuh hlawm a ni. Kan upate ti ti leh an thu khawchang atang pawhin Sailo lalte ropui tan-na chu Lallula atang bian a ni berin an sawi thin.

## BUNG HNIHNA

## LALLULA FATE CHANCHIN

1. LALPUILIANA : Lallula khan Tilenrawn Pawiho a rawt hou khan Pawihorawn er leh tur hlauvin a khuate khan an pem san ta sup sup mai a, a mangang hle a, a fapa upa ber Lalpuiliana lah kba a hrisel loh em avangin tbleh nei hman lovin a thih mai a hlau bawk si a, a nupui tur a zawn sak ta a. Fapa huaisen tek a rawn hriin sak theih beiseiin, a khaw nula huaisen, mahni chaub pawha hlothlova riak thin, Pawi nula Khuangtieli chu a neih sak ta a. Lallula chu kum 1767 ah chuan a rawn thlangtla ve ta a ni. Vanlaiphai chhak Bawktlang-ah khien an rawn chhuk a, beta an awm lai hian Lalpuiliana chu a thi ta a. Fa pahnih a nei hman tawh a, Vanhnurithargi leh a nau Lalsavunga te an ni. A pa beisei ang ngeiin Lalsavunga hi a huaisen a, a fang hle bawk a, Mizoram Laho zingah chuan a chhuan-awm em em a ni.

Lallula fapa dangte chanchin kan sawi bmain, a rawn thlang tlaka a insawona khuate sawi leh lawk ila.

1. Zopui atangin Bawktlangah 1767
2. Bawktlang atangin Lungchhuanah
3. Lungchhuan atangin Piterah

4. Piler atangin Bawngchawmah
5. Bawngchawm atangin Serchhipah
6. Serchhip atangin Sialsuk (Diarkhai)-ah

Heta an awm lai hian Vuta kha 1776-ah a piang.

7. Diarkhai atangin Samlukhaiah

Heta an awm lai hian Lalsavunga'n nupui a nei a, 1783-ah chuan a pa Lallianvunga bul Zawngtah-ah a indang.

8. Samlukhai atangin Darlungah
9. Darlung atangin Kanghai
10. Kanghai atangin Hreihukah

Heta an awm lai hian a brisel thei ta lo va, 1807-ah chuan an nupain an thi ta.

2. LALLIANVUNGA : Lallianvunga hi Lalula fapa pahniha a ni a, a pa Diarkhaiah a awm lai hian a indanna turin Sailem tlang saw an va en a; mahse, hmun va entute zinga pakhat chu Sakeiin a lo seh a, Mizo upate pui-thuna zâwng tek mai a ni si a, Sailemah chuan a kai duh ta lo va, Hmuifang tlangah sawn a kai ta zawk a ni. Hmuifang tlanga an kai hi Pa Zawla chhut dan chuan 1780 a ni.,

Lallianvunga nupui hi ther kbat sawi dan chuan Lushei mi, Palian hnam niin an sawi. Nupui ka neih tirhin, ka nupuite khua Bisteah ka han zin a, ka nupui Khuangchhungi pu Chawngkunga (Lailen chaka an ti baw) khan heti hian mi lo hrilh a, "In thlahtu Lallianvunga khan ken pa Lutbeka farou nupuiah a nei a, tunah hian chhuan linaah minrawn zing leh ta a nih hi. Pathian samsuih ngei in nih ka ring e" a lo ti a. Chuti ni se Lallianvunga nupui chu Khawhbring a ni ang a, a hming chu Roliani a ni.

Pu Zawla sawi dan chuan Lallianvunga hian Hmuifang tlarga a awm chhuog hian Khuang a chawi hman a, a khua pawh hi in 500 an tliog hman a ni a ti. Ken upate sawi dan chuan Lallianvunga Hmuifang tlarga a awm lai hian Chamring an tih hmunah sawn dsido turin in tam fe chu a dah bawkin an sawi. Lalsavunga kha a la naupang si a, a pa Lallianvunga enkaw! phak turin 1783-ah khan a pu Lallula chuan Zawngtahah sawn a indan tir ve a ni.

Hmuifang tlang hi a sang a, a yawt em em mai a, mibring leh an ran vulhte thleog pawhin an lo ching zo ta a; chuvangin an tulang phai tlang hlumah sawn an insawn chhuk te ringawt

a. Chutah zet erawh chuan mi ring leh an ran vulhte pawh kha an lo rai thei leh ta a, an lawm em em mai a, nula sawn pawm pawh an lo tam ta mai a, "Sawn ngek khua" tih a lo blawh ta hial a, tun thleng pawhin saw lai phai tlang hlum saw "Sawn ngek ram" tih hming a lo pu hlen ta a ni.

## SAILO LALHO INBIAK HONA HMASA

He inbiak hona an neih hi a tun lai tak chu briat a ni ta lo va. An unau thlangtla hmasa Z deng lal te, Palian lal te, Thangluah lal hote khan Sailo lalho rawn thlangtla ve chu lo khawngah taku ruangir, an lo huphurh a, an lo er deuh zel mai tih an hen briat khan an nek lam tur an insem ta a.

- (1) Lallula leh a thlahte chuan Zadeng lalho hi bei sela,
- (2) Rolura thlahte chuan Palian lalho hi bei sela.
- (3) Lisnlula thlahte chuan Thangluah lalho hi bei sela tiin an rel ta a ni.

Hemi an rel lai hi chuan Sailo lalho ai chuan an unaute ho hi khaw ngah zawk an la ni vek

a; mahse Sailo lal ho pawh khan tlâng tam takah khua siemin an luah ve tawh a ni.

An unau thlangtla hmasa hote khan lal an lo chhek deuh avangin an khuate khan an lo ning deuh vieu hlawm tawh e, an bula Sailo lal khaw tê tak tê tê kha, an belh sao ta hlawm mai e, anmahni bitum tura an rel ang khin an tutlawm thei ta theuh a ni.

Sawnggek atangin Lallianvunga chu Kelsib khawbul Chawngmo-ah sawn a insawn phei e, heta an awm lai hien hmar lam lalte khan Sailo lal hoten an rawn nek zau chho zel ang tih hlauvin Thabdo lal Ropuia pa Khawtinkaia chu Phuaibuang bula Hiangmual-ah khian an rawn awm phei tir a. Chu chu an briat veleh Lallianvunga hote chuan an han bei e, an lal Khawtinkaia te nupa chu an rawn min a, Lallianvunga inah chuan rei tak an tâng a, tlan chhuah ngaihna an bre si lova. Khawtinkaia chu a â der ta vak mai a, tlangvil ho chuan a â tak tak emaw an ti e, an veng tha duh ta lo va; chu veleh a rukin, an nupain an tlan chhuak ta a ni. Tin. Pawi râi lam pawh a lo zual ta hle mai a, rawlrâlin an rawn che a, an tawrh hlehlawm hle mai e; chuangin Luanglang-ah khuan an insawn chhuak ta a ni. A pa Lal-

lula pawh kha Samlukhai atangin Darlung-ah a in sawn chhuk ta bawk a.

An unau thlangtla hmasa Zadeng lalho te kban an lo huphurh ble mai a, buaina eng engemaw an slam fova, chuvangin Lallula leh a fate ho chu inblat taka awm pawh thain an hre rih lo va, in hnaih takin an awmkhawm deuh a ni Lallianvunga kha an unauho zinga upa ber a ni ta bawk a, kawng engkima an rawn ber leh an thusa ber a ni.

Lallula thih hnuañ phei chuan thu leh bla innek mai ni lovin indo tak tak ang deuh hial-in an che tawn ta mai a; vawikhat pawh Zadeng nena an inbeibna atangin an Darkhuang ngaih hlut em em Kawlkhen dâr an tih chu Lallianvunga chuan a laksak ta hial a ni. Zadeng nena an indo tantirh lai hi chuan Lallianvunga kha Lungleng-ah a la awm a, mahse, betah bian rei tak awm lovin Tanbril-ah khuan an insawn chho ta a ni.

## LALLULA FATE INBIAK HONA

Lallula fate ho chuan "kan inhawl zau ve deuh loh chuan rei lotêah kan chep lutuk mai dawn a ni" an ti a, inhawl zau dan tur kha an rel ta a. Hmanah an Unau dangte nena an rel ho tawh ang deuh bawk khan nek lam tur theuh an insem ta a, betiangin :—

1. Lalsavunga chu hetih lai hian Hlimenah a la awm a. Durtlang atanga rin ngil chhovin Tualbung tlang zawn chhovah Mawmrang tlang hrula rin chhov zelin khawchhak chho hi nawr sela an ti a. Lalsavunga fapa Vanhnueiliana chuan Champhai a thlang chhova, ram chu Tiau lui thlengin a chang thei ta a ni.
2. Lallianvunga leh a thlahte chuan Durtlang atanga rin ngil chhovin Tualbung tlang zawnah a chho vang a, Mawmrang tlang hwap tlin, hmar chhak chho hi nawr sela an ti a. Lallianvunga tupa Vanpuilala chuan Khawlian tlang a awm lai; Tuiruang kam Maulien ram thlengin a va la a, a vele hnam dang awnte chu a va um darh vek a ni.
3. Lalmanga leh a thlahte chuan khawthlang lam hi nawr sela an ti a, Tuikuk, Tukam leh hnam jawkhawk dangte chu a zu um darh vek a, ram chu Sakhan tlang tlang khuan a zu chang thei ta a, Mizo tam tak pawh aa pem chhuk a, tun thlengin an awm hlen ta ulawm a ni.
4. Vuta chuan chhim chhak chho hi nawr rawh se an ti a. Vuta crawh "Pawi hovin



min man tuma min hrui chhohna zel kha  
 ka chhui chho ange" a ti bawk a. Mahni  
 bitum lam tur theuh chu an nawr ta hlawn  
 a. Vuta leh a thlahte chuan Tieu lui thleng-  
 in an han chang thei ta a ni.

Lallianvunga chu Tanbril atangin Sairum-ah  
 a insawn phei ta a, Lalsavunga pawh Hlimen  
 atangin Aizawl-ah hian a rawn insawn phei ta  
 bawk a. Heta an awm lai hian Tuahzawl-a  
 awm Zideng lai Lalchungnunga chu zu rawk an  
 tum a, a pa Lallianvunga hote chuan thu leh  
 hla maia inbe hove, an neihsum, an thi leh an  
 dar te laksak tum chauh an ni a, mahse. Lal-  
 savunga ho te khan Silai an rawn hmet ri ta  
 mai a. aoi pawh hi mite tihthaihna ang lek  
 tura rawn che kha a nih avangin turah an thi  
 tam lo ve, an lai fapa Ngurpuilala erawh chu  
 a awmtu nu Engnemi nen an man a, an hrui  
 sak ta a, Aizawl-ah hian Lalsavunga hceah an  
 tan tir ta a ni. Hetih lai hian Lalmanga pawh  
 kha Reiek-ah a rawn kai chho tawh a, Vuta  
 pawh kha nupui la nei lo mah se, a nu hovio  
 Arte-ah an indang ve ta bawk a. Lalmanga  
 khua te khan ao thlang lama Tuikuk khua an  
 zu run a, tam tak an that a, tam tak an rawn  
 man bawk a. An sal man zinga hmeichhe pakhat  
 chu an lalpa hin ve turin thah tir an tum a.

Chu hmeichhia a han kap hlum tur chu a Silai a puek keb ta hlauh mai a, Lalmanga chuan a inbliemna chu a thibpui ngei dawna a hriat avangin hetiang hian a phuah ta a :

Thlangah kawrou bahsam kher vangin  
 Kan chawi suai e laipui tek sialah tla e  
 A ngurpui nun hliap ral kai tur chu, tlin a  
 a phuah ta bial a ni.

Lalmanga chu a inbliemna avang chuan 1812 ah khan a thi ta a Zedeng lai Lalchungnunga khan Lalmanga thib thu a lo hriat chuan heti hian hla a han phuah ta a :

“Khawhbring tuchhuan Lalmanga a fam ta e Lalchungnunga'n tunge ka do tak ang le” a ti a. He hla hian Lalmanga unau hote chu a titlawmgai hle a, indo pawh chu an ngawrh ta sauh sauh va, tichuan, Zedeng lalte chu an tlawm ta a ni. Hetih lai hian Zedeng lalte chuan Sailo lai aiin khua an la ngah zawk vek a, hetia an chak lohna chhan hi chu upa ti tish chuan heti hian an sawi thin. Zedeng ho ti an lai a na em em mai a, an khua leh tufte chuan an nioh hle tawh a, chuvangin lamtang an nei tha ta lo a ni an ti thin. Tin, an sawi zelnaah chuan lai an hrawt nasat em avang hian Pathien pawhin a tan ta lo a ni, an

khuaante Sakei huai a tla a, hlo pawh an thlo  
tha thei lo va, nasa takin an tām a, an pēm  
darb san ta mai a ni an ti bawk.

Lalsavunga ina mi Ngurpuilala kha tlan chhuah  
an ban dil ta a. Lalsavunga chuan Ngurpuilala  
tlan nan chuan Siallam dar leh Haizang dar a  
lo ngen a. Heng dar te hi dar hmingthang,  
dar tha em em mai an nih avangin Lalschung-  
nunga chuan a ui em em mai a. “Hei hi Siallam  
dar a ni e, hei hi Haizang dar a ni e” tiin  
darbu tha tik tak te kha an han pe thin a,  
mahse Ngurpuilala awmtu Engnemi khan Sial-  
lam dar leh Haizang dar te chu a hre em em  
mai si a, “hei hi chu Siallam dar a ni lo, hei  
hi chu Haizang dar a ni lo” tiin a lo hrilhru  
zel a. A tawp a tawpah chuan dar dik tak chu  
an rawn pe lut ta a, Ngurpuilala pawh kha an  
hrui chhuak ta a ni. Lalsavunga chuan Darbu  
dang an rawn pek luh te pawh kha a pe kir  
leh duh chuang lo va, Darbu paruk lai an neih  
pah ta zawk a ni.

Lallianvunga khan Lalsavunga hnenah “Lala,  
nang naupang zawk chuan, heng darbu te hi i  
duh duh thlang rawh” a ti a, a thlan tir ta a.  
Siallam dar te, Sukchin dar te, Dawlpa dar te,  
chu a thlang a, a pa Lallianvunga chuan Haizang  
dar te, Khawhawl dar te a chang ve ta a ni.

Siallem dar hi Lalsavunga thlah a mi Zaingen khaw lel Kaibranga'n a la kawla ni. Tin Haizang dar pawh hi Lallianvunga thlah a mi Hon.Capt Laltinkhuma'n a la kawl bawh.

Ngurpuilala tâng kha an khawngaih a, an ngai em em mai a, an tap mur mur thin a ni an ti. Hetia Lalsavunga'n Siallem dar leh Haizang dar a ngeena kher pawh hi Ngurpuilala an ngaih zia an phuahna blaah pawh heti hian an ti a.

Ka tuai Ngura'n chhak thianga hrentbir a bun Haizang dar leh Siallam in sut zovang maw, tiin an phuahna hla te an lo briat avangin beng dar pahnih te hi an phut a ni. Lallianvunga te pawh chuan heti hian an han phuah ve a :

1. Chawnglul Zadengin lo ngai rawh u,  
Kao chungah turni chang êng rawh se.
2. Kan chungah turni chang êng rawh se,  
In thlunglu ah kulva chang chuang lovin;  
Lian-ak chuang rawh se
3. In thlunglu-ah Lian-ak chuang rawh se,  
Kao thlunglu ah Kulva chang leh;  
Ngeachi chuang rawh se.

Lallianvunga chu Sairumah a awm lai hian phei lam atengin Thabdo thenkhatin an rawn bel chhova. Kum rei tek pawh an awmho

hmajin Lakhipur phai lamah khuan an chhuk  
 san leh ta a, mahse, Suanmanga chu a pem ve  
 dub ta lo va. Chi leh kuang tumah. dang nei  
 ve ta lo chu mal ema a inhriet avangin lai  
 vanlungah a lut ve ta mai a. Vanlunga a awm  
 hnu hian, a unaute ho Lakhipur phaia pemho  
 kha kan turin a zu zin a. A unaute ho chuan  
 lai vanlung a ur ve ta tih an lo hriet chuan a  
 kir chboh an phal ta love, an veng ta tlat mai  
 a, a nupui leh a fate ho pawh hmu pha lovin  
 phai lamah chuan a zu thi bo ta a ni. A fapa  
 Pausia chu a lo tlangval a, lalin nupui a neih  
 sak a, a in dantir ta a, Pausia chuan fapa pakhat  
 Khawthangvunga a nei a, mi huaissen sakap  
 thei a ni a, fapa pali leh fanu pali a nei a, lai  
 leh khawtlang tan an tangkai em em a, Sailo  
 lalna a tawp thlengin Lallianvunga thlahte en-  
 kawltuah an tang a ni

Lallianvunga chu Sairumah a awm lai hian  
 kum 1813-ah khan a thi ta a, fapa pahnih leh  
 fanu pakhat a nei. Hengte hi:—

1. Lalngura 2. Ropuithanga 3. Darchawng-  
 puii te an ni.

3 LALMANGA: Lalmanga hi Lallula fapa  
 pithumna a ni a, lai fing tak, zaidam tak, hu-  
 hâng nei tak a ni a. Zedeng laiho pawh kha  
 Si'ai leh hriamhrei hmang lo va, hla ringawta

tuk tlawm theih a inring a, mahse Silaia a in-  
bham tak avengin 1812-ah khan a thi ta a.  
A thih hma hian a indanna khua Bedo atang-  
in Reiek-ah hian a awm hnan tawh a ni. A  
hming hi Mangpawrha tiin an sawi lar zawk  
mah a, upaho sawi danah chuan hmusitne  
lawngka n ni lovin thian inkoh fianna a ni  
zawk mah awm e.

Lalmanga thih hau hian a fapa Suakpui-  
lala'n a thlak ta a. Suakpuilala hian a pa a  
chhun a, a fang em em a ni. Vailian pawh  
kha tha takin, ramrite siamin a lo inrempui a,  
inremna sa-uite an tan a, mahse 1880-ah khan  
a thi ve ta a ni. Tunah hian chuan Suakpui-  
lala'n sa-ui tan meuhva a lo inrempuina ramri  
siamte pawh kan chang pha ta lo a ni.

4. VUTA : Vuta hi Lallula fapa naupang ber  
a ni a, kum 1776-ah khan a pa Lallula Diar-  
khal (Slalsuk)-ah a awm laiin a piang a, Lal-  
lula fate zingah chuan a dam rei ber a ni.

Kum 1800'ah khan nupui a nelh hmain a  
nu nen Arte-ah khuan an in darg ve a, mi-  
fing tak leh thiltithel tak, mi hnehsewh thiam  
tak a ni. Intihlal dante pawh a thiam em em  
mai a, a thiante ho chuan VUTTAIA tun an ko  
hial a ni. Arte klusa an awm lai hian Za-

huata khua Sialbau rûn turin an pasalthe Lal-  
 thangvuta te, Papua te nen an kal a, kulhab  
 an lub theih rib loh avangin Zabau lal khua  
 Thentlangah chaw zawng turin an kal a, Vuta  
 chu lal fapa a ni tih an briat avangin an lo  
 man ta mai a. Hei hi a tlanchhuahna tur  
 sum tam tak beisei vanga man an ni awm e.  
 Vuta chu Falam lamah an bruai chho ta daih  
 a, kum li aia rei meh a han tang a ni. Sailo  
 lalho tangrualin Se sawm hu laiin an han tlan  
 chhuak leh ta a. A lo chhuah hnu chuan Ar-  
 thlawr (Phulpui) ah a kai chho va, chuta tang  
 chuan Khumtungah a kai chho leh a, chuta  
 tangin Hualtuah a kai chho leh ta a ni. Hual-  
 tuah hian a intiropui ta hle a, chhiabhlawhte  
 a ngah bawk a, a in chu hlam 100 a ni a,  
 kawrite pathum a sak khûm a ni an ti thio.  
 Vawk 100 in a Chawng a; tin, he khua a  
 awm lai bawk hian thang a chhuah a, Zau a  
 dawh an ti bawk. Tuk khat chu nula buh  
 phur hi a kawmthlang kawng nalah chuan a  
 lawlbthlu a, lai ina ups zu in hote kha an lo  
 chhuak a, a zak em em mai a, a buh buate  
 chu rawp ruhpuai an tum a ni a, mahse chu  
 nula zak lutuk chuan. "Vuttaia lal laiin buh  
 bua ka rut lovang" a ti a, a kalsan ta daih  
 mai a, chu nula lawngkam chuan Vuttaia chu  
 a tilawm khawp mai a, a buh zem ami rutin  
 chu nula chu phur huih lai a chhiabhlawhte a

va pek tir ta zawk a ni an ti. Hualtu atang hian Rullam-ah a kai cho leh a, heta an awm lai hian sa pelin a rem yak thin a ni ang, tuna Lungpho khaw chung tlangchhip sang lai taka luogpui hian tek khi "Yuta pilum aia" an ti thin. Rullamah hian kum 1884 ah khan kum 108 damin a thi ta a ni.

### BUNG THUMNA

Lallula fate qhanchin kan sawi zo tawh a, Lallianvunga tlahte chanchinah kan lo lut tawh ang a. Lallianvunga fate chu Lalngura, Ropui-thanga, Darchawngpui te an ni.

**LALNGURA :** A pa thin hnu hian Sairum atang kha Tawngpam (Santlang) ah a kai chho va, a neu Ropaithanga chu Tuiriel kama Puan-sen tlangah khuan a kai tir bawh a, mahse nupui nei hmen lovin, tlangval lain a thi ta a, a chanchin sawi tur a awm ta lo. A farou Darchawngpui kha chuan an khaw pasaltha, sakesp thei Thaitawana, Pachuau mi an seih tir a. A maw a taw, Saithel nghe the pali a po a, an khawperah an awm tir a, bunchhun leh sa-qbhih pawh an ei tir a, Sihi perak leh ohhih-bhawh pasarih an thum tir bawh a ni. Papa pahni an, sei a, Lalchhuma leh Vana te an ni. Lalchhuma fate chu Sempa leh Rohana te an ni, a, Vana fate chu Vakthawle, Rokawnga,



Lusia, Thavele, Pachhunga te an ni. Heng an  
thlate ho hi tun thlengin Lallianvunga thlate  
ho khuah chuan rinawm takin an la awm  
theuh a ni.

Lalogura hi Tawngpam (Sëntlang) ah a awm  
lai hian Vaiho (British sorkar) nen ramri ap  
siam a, Cachar nena an inrina tura an ruat  
Maupa kawi chin-chu Lalogura ram ni tura in-  
rem an ni. Mahse phai ramah khuan Thing-  
puite a lo that theih em em si avangin an rawn  
duham chho zel a, Lalogura ram chung te chu  
an rawn vat a, thingpuite an ching a, an ram  
chhuahna te chu an rawn tiphul zo ta a. Chu-  
vangin Lalogura ho thinrim chuan an zu run  
thin a, mi tam tak an that a, mi tam tak an  
rawn man haw thin a. British sorkar tan  
Thingpui huan enkawlte pawh a lo harsat phah  
te hle a, chutih nika lai chuan betih hun vel lai  
bawk hian Palsanga thahdo khua (Mangchini  
ru kulh) an tih mei thin chu an ya run a. an  
chimih theih a, mi tlemte tlan chhuak chu Sil-  
char Borsap hnenah an lut a, an zuako vak  
a. Tichuan British Sorkar chuan Lalogura man  
tur leh a khua hal darh vek turin Col. Lister  
hovin Sipai tam tak a tir chho ta a.

Lalogura khaw tlangvalte hi an lo kawlhnen  
ve khawp a, kawthlerah te an inbei nasa em

em a, a tawpah chuan Sipai ho chuan an inte an bel sak vek a, a tan hloih theih ta lova, an lainu (Laingura nupui) Lshlupuii chuan in-remna a lo sham pui ta a ni. Tin, vai sal an kawl zawng zawng te chu lak kir sak vek an tum a, mahse thenkhat chu pasal lo nei hman tawh te an awm a, chungte chuan kir leh an duh chuang tawh lo. Tin, vai naupang pakhat chu an pe kir phal lo bawk a, an thukru tlat a, an kawl hlen ta bawk a ni. Ho naupang hi naupang tha tak a ni a, a hmingah chuan Sakawra an ti mai a, Laingura fapa Vanpuilala hun thlengin a dam a, nupui an neih sak a, a thlabte crawh chu cbhui zel lo mai ila. Vanpuilala chuan a upa Zapuithanga hnenah chuan (Zapuithanga hi Chaltlang lal Thangphunga pa a pi.) "Sakawra hi nangman lo cakawl la, Mizo tawngte lo zirtir teh khai" a ti a. Zapuithanga chuan Lushai tawng a zirtira avang chuan amah pawhin vai tawngte a thiam phab ve ta a. Vanpuilala chuan Zapuithanga chu Silchar Sap be tur leh Tuiruang leh Tuirial dunga vai sumdawng leh thing leh mau la ho hnen a tanga cbhiab khawo turin a hmang ta ber a ni.

Tin, Vanpuilala 'thih hnush chuan Zapuithanga kha Kalkhama khush a pem ta a, Sakawra chu Vanpuilala bawi lal D rphâwnga'n a kawl te thung a, ani pawh bian vai tawng a

thiam phah ve ta a, 1871-a Vaillian ban kal  
tum pawhin Vai chhawntu Montiri an tib ber-  
ah atang thei ta a, Vai lam pawhin Darphawnga  
hi an hmengin an ring em em a ni.

Tichuan Lalngura khua atang chuan vai sal  
400 chu an bruai kir thei ta a. Kum 1850-a  
Lalngura khua an rawn run lai hian Lalngura  
awm loh hlan a ni. Hetih lai hian a kbawper  
hotu Zathata, Khelte mi chuan Khuang a  
chawi a, a Khuangchawi chhim turin an lai  
chu an duh em em a, "Lalngura chuan ka  
Khuangchawi hi rawn chhim selo, Darbu tha  
ber Tusichawng dar hi khum bawntir ta ila,  
Lalngura thlakte hian belrawh mual an kil  
chhung chuan Zathata fate hi in-lo ramah lai-  
ber fo turin dil ta ila remti tak ang maw aw"  
a ti thin a. A beisei leh duhthusam angin  
Lalngura chuan a remti ta a, a Khuangchawi  
chu a va chhim sak ta a ni. Chu mi a chhim  
hian chuan Vaillian hian a khua an lo bal sak  
ta a. Khawlaiah thisen a luang nasa em em  
mai a, chuvargin a khaw hmingah pawh hian  
'SENTLANG' an tib phah ta a, tun thlang  
pawhin chu hming chu a pu hlan ta a ni.

Lalngura nupui Lalhlupuii hi Laltuaka fanu  
a ni a, Sailo leh Sailo innei hmasa ber an ni.  
Hetih hun lai hi chuan unau inhnai deubte chu  
nupui pasalab an la innei ngai lo va, anni pa-

hnih pawh hi kan upate sawi dan chuan  
 "Puṭhuam" a ni tawha sawi an ni. Puṭhuam  
 awmzia chu thlahtute chhui a, pute ve ve  
 unau piangho nite kha an ni

Lalngura fate chu hengte hi an ni :

1. Vanpuilala.
2. Romangpuii. Kaibranga pa Doṭhiauva nu-  
 pui a ni a. A nulat lai chuan Lal nula  
 hmelṭhaa an sawi a ni a, a hmelṭhatzia kan  
 hriat theih nan chuan "A ṭhifên leh Ro-  
 mangpui a chungnung e, lurin, lur, lur e"  
 tia naupangin tun thleng pawha tuelchai  
 hlaa an la hman hi he mi Romangpuii  
 hi a ni.
3. Lalsatpuii. Lalsakeia pa Thanghulha nu-  
 pui a ni.
4. Khawhmawrchbingi. Chhim lai a nei a,  
 Tlebung velah sawn an awm a ni ang, a  
 pasalte chu Sai o ho nena an indo lain,  
 Sailo ho kha an chak ta zawk a, an ûm  
 phei zel a, Khawhmawrchbingi hian "Ka  
 nuṭate ho khan zahngai tawh rawh u, Bor-  
 kawlb kan thleng tak ngial dawn e" a  
 rawn ti a, an ṭinsan ta a ni.
5. Lelseipuii. A nulat lain a thi.
6. Lalkhuma leh } Inbraog fa an ni a, an
7. Hrathleia } thi ve ve.

8. Darinpui. (Mi pian fello deuh a ni a, tin, an pianpui chiah a nih kan bre lo bawk. A vakbo dèih ringawt mai a ni.)

Lalngura chu Sentlang ațangin Sesawngah a kai chho ta a, a unaupa Lalsavunga pawh kha Vizawl ațangin Darlawngah hian a rawn kai chho ve ta bawk a, an thurual em em a, an tang tlang dial dial zel a ni. Hetia Sailo hotten hmar lam leh chhak lam an rawn nawr zel hi Hmar te, Thahdo te, Sukte hote chuan an ngaimawh em em a, Hmar leh Thahdo tangrualin Thahdo lal Siakzapauva ho chu an pasalthe thlan hlir in 20 lai Mawmrang kham hnuai, mual zingzum, mual touhlawt tē tak tē ah khian Sailo ho nek turin an rawn awm tir a. Thlawhhma lak ngai ve lovin, buh chhunga va chawm mai tur an ni a; tin, an hnathawh tum dan ber pawh Sailo khuaah rawlrâla chet tum an ni a. An tum anga hna an thawh hmain Lalngura leh Lalsavunga tangruel khan an pasaltheate ho an tir chhuak a, Siakzapauva kulh hi an han bei ta a. He mi tuma an pasalthea tlangvalho hrusitute chu Vanapa te, Pa-ua te, Zabiaka te, Zaphunga te an ni. An khaw luhna kawnga arlei, zantina an pheh thin kha an lo phet theihngbilh a, Vanapa hote chu an lut thei ta a, mahse tlan chhuahna tur khân ruk (kawng ruk) an lo neih avangin mi

tam tak pawh an that hman lo va, an tlan chhuak hman a, a vanduai deuhte erawh chu khemah an zung thla nual a ni awm e. He mi thu thawm bria hian Sakte ho an chhak lama awnte pawh khan an blauthawng ta a, Tawozang lemah khian an tlanche chho zo ta vek a ni.

Mahse hmar lam atang khan an la rawn pawng leh ang tih hlauvin an pasalhtate tangrual bawh hian Manipur bialah sawn thuk tak thlengin an va lut a. Reng sipaite nen pawh an va inkap pha hial a, Reng sipaite silai hman "Tukuh" kan yuah tak mai hi tam fo an rawn man sak nghe nghe a ni. Lalngura leh Lalsavunga te tangrual hi an chem a kal hle mai a, an pasalhtate ho hi an chhuanawm bawh a, he mi hnuah hi chuan tumabin an rawn tibuai ngam ta lo a ni.

Tin, Lalngura khawper hotu Zathata Tuai-chawng der pek kha Lalngura thlah a mi Lalhleia fapa naupang ber Lalluaha'n a la kawh a ni.

Tin, Lalsavunga kha Darlawngsh hian kum 1835-ah khan a thi ta a, a thih hnuah chuan a fapa Vanhnuailliana'n a ni a awm ta a ni. Lalngura pawh kha Khawruhlianah kai chboh a tum a, a hmei nu Picheri chu a kal hmasak tir a, tura Khawruhlian piaha "Picheri hmun" an tib khi a han awma chu a ni. Tichuan Lalngura pawh Khawruhlianah khian a rawn chho ve ta a, heta an awm lai hian a thi ta a ni.

## BUNG LINA

VANPUILALA : A pa Lalngura thih hpuah chuan Phaileng-ah a kai phel a Phaileng ahang in Zawngin-ah a kai chho zel a, Hetah hian Chenkual mi Pibuki chu a nei a, mahse fe an neih theih loh avangin a then leh ta a. Lal savunga fanu a va rim ta a ni.

Hetih lai hian Lalsavunga chu a thi tawh a, a fapa Vanhnuaiana chu Lamzawl-ah a awm lai a ni a (Lamzawl hi Saitual bul vel khi a ni awm e) Vanhnuaiana hian khuate a ngah a, a ropui tan hle tawh a ni. Tin, an khuate pawhin an chawimawi thiam bawk a, an khawthleng te pawh a remin, a nuam hlein an sawi. Lalsavunga fanu a u hnena awm Chawngpuituali an va hel chu, hla te an phuah nasa bawk a, chung a hla te chuan a nupapa Vanhnuaiana pawh a ti lawm hle a ni awm e, an ban in sawi tak tak hnua phel chuan "in hla phuahte hian sial a man e" tin Chawngpuituali man chu Stalin a ti hniam ta nghe nghe a ni. Chuta an hla phuahte chu tun thleog hian "Lamzawl zai" tii an vuah hlen ta a ni. An hla phuah kan la briat reng thenkhatte chu hengte hi an ni :

1. Lamzawl lai chu thutin ropui tuah thiam lungliana,  
Biahzai nem e khamrang khuai ang kai ran

2. Chawngpui nunnem tuk loh ram ang kan bual,  
Vangkhuah tui ang siam liante chhung thlang  
vai ang la i.
3. Chawngpui manah kan neih sum tam behhi  
kal zove,  
Hmartlang ka rua i te leng lo, Kawlkhen  
dar lo chu.
4. Thsiah kan hel chung Pathian siam a ngur  
bungdawn tuai,  
Chawngpui kal la, hmar tlang lai reng run in  
thim ruaiah.
5. Chawngpui kal la hmartlang lai reng run in  
thim ruaiah,  
Tui a tam leh tiandar bu riat nempuanin  
awi i.
6. Hmartlang laldanga u te chuan tuan kan  
rel love,  
Bel zu kungah Chawngpui sakhming dai  
ten kan awi e.

Tichuan Chawngpuituali chu Vanpuilela chuan  
a nei ta a, Zawngina an awm lai hian fapa  
duhawm tak Lalhleia chu 1860-ah khin a lo  
pianga. A kum lehah cunin Mizovin Mautam  
kan briat hmasak ber chu a lo thlang ta a, a  
rapthlek hle mai. Mi thenkhat chuan lai iopui  
an bel a, chutah pawh chuan intun nuona tur  
awm tam bik hek lo, tam tak chu ramhnuaiiah



kamrah ringin an vak thio a ni an ti, chu chu kum 1861 a ni.

Zawngin atang hian Khawlian tlangah a kai a, tah chuan a fanu Lalziki chu a lo piang a, fa pabnih chaub hi a nei hman a, Vanpuilala chu a thi ta a ni

(Chin-Lushai land by Lt Col A.S. Reid leh Mizo History by Rev. Liangkasia te ziak atanga han ngaihdaun chuan Vanpuilala thih kum hi 1869 leh 1870 inkar chu ni thei ngei awmin a lang e)

Khawlian-a an awm lai hi an ropui lai ber a ni awm e. heta an awm lai chanchin leh an ropui dante chu Ralte upa ho zingah hian min hrilh thei an la tam a ni. Khawlian atanga hmarlam mel li velah hian daido turin in 50 lai an awm a, chuta awmte chu Hmar hlir an ni, tin chhim lama Hiangmual an tihah khian a neu Hrath'eia chu in za lai khaw neilin a awm bawk a, mahse Hrath'eia hi a dam rei ta lova, nupui a neih hmain a thi ta a ni. Tin Durtlang achin hmarlam tlang lian deuh deuh ah te hi chuan Khawper in za lek lek a nei thluah bawk a, a nu Lalhlupuii Fovin Darlawn tlangpui "Hmunpui" an tihah hian in 300 lai in an awm bawk a. Amah Vanpuilala awma Khawlian chu in 1040 an ni a Chutia khaw tam tak a han nei ta chu a lawm em em a. Nikhat chu tlangvalho a chhier tir a, an chhier

dan chu hetiang hian a ni. Tlangval khon ipte pui an ak a, in pakhat kawt atangin lungte pakhat an chhar zel a, tichuan an lungte chhar zawng zawng kha an chbiar ta a ni, a dik duh ve awm hle mal.

He khuaah hian Zawlbuk 10 a awm a, chung zinga a lian ber Mualveng Zawlbuk chu hlem sarih a ni a, tin a tê ber pawh hlem thum a ni. Tin thir denna Pum 30 a awm bawh a ni. Hetia khua a ngh em em avang hian tumahin an rawn rûn ngam lo a ni.

Thu dang han zep leh lawk ila : Vanpuilala, Khawliana a awm lai hian a pa unau Lalsa vunga fapa Vanñnuailiana chu Champhaish khian a awm a, an chhak a mi Sokte ho nen khian an indo thin a, an iohneh tawh ble thinin an sawi. Chutia leido nei renga awm chu a tu ve ve lam tan pawh a brehawm a, inremna siam an lo rel ta a.

Sa-ui an tan a, tin, an Sa-ui tan dawn chuan hetiang hian thutiam an slam a, chu chu an tiam ve ve a ni. "Vahmim meilin ban a chen hma leh Run tui a lebluan hma chuan indo tawh lo ila, kan chhiabhlawhte tlan chhuak leh kan khuate pem pawh lo awm sela kan inpe let leh vek ang," tiin thu an tiam tawn a, Sa-ui an tan ta a ni. Varpuilala erawh chuan,

“Sukteho ka khaw pum zat lek te chu ka hlau lo ve” a ti a, an Sa ui tannaah chuan a tel ve duh lo.

Hetia inremna an siam hnu lawk hian Sukte lal Zapauva chhiahhlawhte chu nupa tuak 30 lai Vanhnuailiana inah chuan an rawn tlan thla ta mai si a, an rawn um zui a, pek kir leh zai an rel ta mai si a. An zinga nupa tuak khatte chu Vanhnuailiana monu Romangpuii khawngaihthla an la riau bik mai a, thu a hrilh ru ta a. “Hei kan pa hian a hum ngam dawn hauh lo che u a, pek kir leh zai an rel che u a. Nangni nupa hi chu ka klawngaih si che u a, ka u Vanpuilala hnenah kal ang che u. Kal kawngte pawh ka hrilh vek ang che u. An pek kir leh che u zawngin an lo that che u emaw a ni ang a, ka u saw va pan ula, ani chuan Sukte lalho chu a hlau ve lova, Sa-ui tannaah pawh a rawn tel ve duh lo a ni, a lo hum ngam ngei ang che u” a ti a.

Chu mite nupa chu Romangpuii hrilh ang chuan zanah an relhru chhuak ta a, Vanpuilala khua chu an va pan ta a ni. A khawper Hiangmualah an lut hmesa a, chutah chuan a nupui chu a dah tha ta a, amehin Vanpuilala khua chu a va pan ta a ni. Lal hnenah chuan a chanchin leh Romangpuii thu rawn dan te kha a

brilh vek a, Vanpuilala chuan "Ka sutpuirawn  
pawm tawh chu tumahin ka thu lo chuan an la  
chhuak thei lovang, engmah hlau sub, tha tak-  
in awm la, nupui pawh ka khaw nula i duh  
ber ka leisak ang che" a ti a, chu pa chu thla-  
muang takin a awm ta a.

Nupui nei a nih kha chu a la zep ru tlat a,  
Vanpuilala thu tak tak a la nghak ru tlat a ni.  
Thla khat lai hnua chuan Vanpuilala chuan,  
"Nupui ka leisak ang che a, tha takin ka inda  
tir ang che" a han ti leh a, chutah zet chuan  
ti tak tak hmel niin a hre ta a. "Ka pu, nu-  
pui chu ka nei a, i khawperah sawn ka dah a,  
mi hum tak zet dawn a nih chuan ka va hrui  
ang e" a ti a, a va hrui ta a. An nupui chuan  
hlim takin an awm dun ta a, Vanpuilala chuan  
Sielin an thla a hui a, unau angin a dah a.  
Tin, fa an han nei a, an fa chu an puak sak a,  
chaw te an han fah sak ta mai a, an lawm lu-  
tuk chu an nupa chuan an mittui a tla zawih  
zawih mai a ni. Sukte lai ina an awm lai chuan  
fa pahnih an bring tawh a, mahse, an fite hian  
an hoathawhna an dah e tiin an lo feh hlanin  
an tibhlum sak thin a, chung lai hun te nena  
an han khaikhin chuan tuna an awmna lalte nen  
chuan a in ang lo em hian an bria a, an  
lawm avangin an mittui a tla thin a ni. Hemi  
Dalogula te nupa hian fapa pahnih leh fanu

tahnih an nei e, an fate chuan Vanpuilala tbi  
 au pawhin a fapa Lalhleia chu an bel ta zel  
 ni. A fapa upa zawk chu Khuaiia pa Lal-  
 laia kha a ni e, a naupang zawk chu Laltin-  
 iana a ni. Khuaiia pawh hi kum 30 lai Lal-  
 leia Khawchbierah a tan hnuin Hmawngzung-  
 saiah Ser huan siam turin a insawn phei ta  
 ni.

An thu lo tiam tawh ang khan Vanhnuailiana  
 chuan a hum ngam ta si lo va, chbisbhlawh  
 langte kha chu an hruai chho leh ta vek a, Len-  
 lang an thlen chuan mipa zawng zawng kha  
 chu an that ta vek e, "khawthlang an duh  
 lawm" an ti a, Lentlangah chuan khawthlang  
 am hawiin an lu chu an tar vek a, hmeichhia  
 zawng erawh kha chu Lal inah chuan an awm  
 ir leh ta vek a ni.

Vanpuilala khua chu an tam em avangin  
 awma panggaiah chuan rei tak awn thein  
 ual a ni si lova, khawthar kainu turin tlang  
 an leh hnuin rem te a zawn tir ta e. A  
 upa te ho chuan Senvawn tlang saw an thlang  
 deuh ber a, chuvangin a chheh vela hnam dang  
 Mirawng te, Meitei te leh Thado awm te chu  
 an va hawt darh vek tawh a, mahse, vanduai  
 blak takin, khawthar kei an phiar vel lai tak  
 sien Vanpuilala chu a thi ta a ni. Khawlian  
 chu hi Ralte hlang blak an ni e, an upate ro-

rel'a kai tluang tha bawk a, a khawthleng a  
 remia a nuam em em bawk si e, khaw hlim  
 tak an ni thin a; rin loh taka an lai a han thi  
 thut mai hi an ui em em e, an tuer nasa em  
 em a ni. Kan hrist ve pbakah pawh Ralte upa-  
 ho chuan Sai'o lai thi-ah chuan Vanpuilala ang  
 em em khuste jah leh sun hlawh nasa hi mi  
 dang awm thein an ring lo hial thin a ni. Hla  
 phuah thiam Awithanga pa sawi dan chuan, a  
 thih ni atanga ni thum chhung phei chu,  
 chhuat-awngah tui leihbuak palh a hlauhawm a,  
 chuvangin inchhungah pawh zu an in ngai lo a  
 ni. A taktu leh a lenpuitute chu inchhungah  
 an leng ngai lo va, inhnuaiab pawh an khat tlat  
 reng bawk a ni a ti.

Vanpuilala thih dan chu hetiang hian sawi a  
 ni. Paihte lai Hautinkhupa pa Zatuala chuan  
 Tumpang sial leh khuang tha tak a nei e, Van-  
 puilala chuan "In Tumpang Sial hi chitblehtu  
 atan kan awt ve em em mai a, kan lo kawh rih  
 ang a, tin, in khuang pawh hian zai a chawi  
 em mai a, zai hlim nan kan lo kawh ve rih ang  
 e" tiin a han dil a, chu chu an hnial ngem si  
 lo va, an lo pe ta a. Hetih lai hi chuan an  
 chheh vela hnam dang lakte hian an huphurb  
 em em mai a; an eirel si a, mahse, tlawn lam  
 anga tang siin a chhiatna tur an zawng ta ni  
 berin an ngai a ni.

Ni khat chu Zatzuala upate chu an rawn zin e, zupeng an rawn pai a, thu tha tak tak sawi-in Lal chu biakne an rawn rei a. Chumi an zu rawn pai a in chinah chuan, Vanpuil-la chu a pum a na ta nghal a, a thihpui ta thu-i mei niin an sawi thin. Ken upate chuan dawiah an puh a, tin, daw pawh ni chiah lo mah se, an zu rawn pekah khan tûr (poison) engemaw an telh a nih chu a rinawm hle a ti. Chutia a zu peng pai a han insek veleh chuan, Zatzuala upa rawn tirhte chu an tin ta thuai e, an insiam sawk sawk a, an haw ta thuai e, Vanpuilala thiha an silai kab rite chu Tuival ral atang-in an bre hman a ni an ti. Vanpuilala thih lai hian a fapa Lalhleia chu naupang tê a la ni e. Lalhula fapa dangte kha chuan thlah an nei pung rang em em hlawn e, anni erawh hi chu Lalhleia thleng hian mipa pakhat chauh zel an dem a, vandusi pawh an inti em em thin a ni. An chi an mang em erawh chu Pathianin e phal lovah an ngai hial thin a ni.

Vanpuilala hi a mizla rengah pawh mi huai-zen, pasaltha tak a ni ve reng a, ama ho ngei pawhin Tinsuang piah lama Mirawng khua te saw vawihnih an va run a, mi pawh an va that-in sal man pawh an rawn ngah hle thin a ni. Manipur bial mipui mangan dan leh Vanpuilala hi uhawm dan te chu Meitei Reng lal beng a

thleng phak hial a ni an ti thin. Tuiruang leh Tuirlal durgah pawh khuan thui tek thlengin thu a zu nei a, a pa Lalagura kha chuan Mau-pakawi thlengin thu a zu nei chaun va, Vaopuilala crawh hi chuan Silchar Borsap nen Tuirlal dunge Vawklia luh chin khu an ram ri inthen-na a ni. Hman lai atangin Vai surdawng leh Thing leh Mau latute hnenah pawh Vawklia luh chin chhak lamah chuan a khat tawkin chhiah an zu khawn reng thin a ni.

Vanpuilala chu khua a ngah bawk a, chhiah-hlawh pawh nupa tuak 30 vel chu a nei reng a ni; nula tlangval leh neupang tam tak neo. Khawlianah hi chuan a in pawh hlam 30-a sei a ni a. Chung hun laite chuan chungdal leh tukrawp invuak zawma tih nachang an la bre lo va; chuvangin a vang lam chu Tuivai phai maupui tlin tawkin an sa mai a ni. Kbawlianah hian Se sawmin Khuang a chawi a, a khua a zau va, a tual te leh a zawnuam bawk si a. A khuang chawi ni chuan nula tlangval tam tham tak mai hian thing an dim a (an khual lam a). Chhim thler atanga lai mual lam pana an rawn lam phei mup mup mai chu an tam si a, an mawi em em mai a ni. Lal upa tam tak chuan Silai an ken a, thingdim hote chu an lo hmuak a, an va gpusu va, an lo chhah vel a, Silai an kap awih awih mai a, a upa



pakhat chuan "Kawiha, eimah Vanrawng, ni leh tha kara leng ka hi ngai uh, khuang beng pa n'k takah chun ka han k-p te' i ing" (Khaw-nge keima' ni, Vanrawng, ni leh tha kara leng ka hi ngai e, khuang bengpa hnar takah sawn ka han kap teh ang) tiin a han pau vel a, chhim thlor lama kawlai lungpui lian tik, tun thlong pawha la awm khi, a han phe e, a han kap ta a. Vanduaithlak takin, a Silai musop pakhat chu a phawh hmaih a lo awm e, khuang bengpa chu a kap thlu ta der mai a. Thingdima lâm hote pawh chu tibuai lovin a ruang chu an seng kiang thuai a, mahse, a kap-tu pa chu a zak em em mai a, râltlan a tun ta a. Lal upa-hote chuan "Tai ovawh, imah na ti oving, Lal than nang e hi zawk ngai e" (Tlan suh, engmah i ti lovang, Lal thanna tur a ni zawk ngai e) an ti e, a râltlan pawh chu an phal ta lo a ni. Vanpuilala bi a khuatebo chuan amah an chawimawina leh an koh duat-naah chuan Ralte jawngin Vanrawng tiin an ko thin a ni.

Heti khawpa an duat leh an ngainat em em vawilekhata a han thi ta phut mai chu an mangang em em mai a, Mirawng nu pakhat an sal man kha mitthi khu a an lal zui ve tur leh a rawngbawl saktu atan an ti e, an that tel ve ta nghe nghe e, chu hmeichhe fapa erawh chu

an zuaha heti bian an ti "Kan lal fapa Lahlleia hi a mal em mai e, ani hi chu lal unau, lal pianpui turin i zuah eng" an ti e, an zuah ta a ni. Lal unau atana an tiam a nih avangin a hming atan pawh Laltiamthanga an sa e, mahse, a thiante hovin an kohna a hming lar zawk chu Tiambawnga a ni. Upa hovin an beisei ang ngei chuan lal unauva awmin, khua leh tui chhanna lamah te a tangkai em em a, mi huaiseo, sakap thei a ni a, Sai leh Tum-pang thlengin a kap a, mi chhuanawm tak a ni. Thenrual kawm a thiam a, hman loi chuan lal inah bian nitin zu an in mai a ni si e, zu hmun a tihlim thiam em em a ni. Tuiruang rala Vangai tlangdungh sawn tumah an la awm love, an va ram chhuak thin a, an rawu hlawhtling haw thei em em a ni.

Lallianvunga thlahte heti em ema an pian tlem-na hi Kawlkhen dar an kawlvang anih an ring deuh va; chuvangin Vanpuilala thih veleh a nupui Chawngpuituali chuan; breipui a la lawk a, Kawlkhen dar chu a chek chhe ta vek a, Vanpuilala thlanah chuan an tar ta mai a ni. He dar hi Darkhuang lian tak, aw mawi tak leh ring tak a ni awm e. Zedeng lal ta Lallianvunga'n a laksak a ni. Tun hma pawhin he Kawlkhen dar kawltute chu an pieng tlem reng a ni tih thute Chawngpuituali bian a triat avangin tu-

mahio an kaw! tawh lohna turin a chek chhe ta a ni. An unau Sailo lal dangte chuan Kawikhen dar an ui zia chu hrilhfak a tling a ni. Vuttaia phei chuan Vanpuilala a lo thih tak si chuan "Kawikhen dar kha ka lo kaw! ve thung ang e" tiin a la turin upa a tir a, mahso, a nupuiin a lo chek chhe vek tih a briat chuan itsik vangah a ngui lek lek a, a lungawi lo hlo nghe nghe a ni.

Hemi tuma Vuttaia upate Khawliana va kal hote hian Vanpuilala fapa mal Lalhleia, kum kaw mi lek chu an va hmu a, a chum biang mai si a, hmeltha an ti em om mai a, Vuttaia hnenah chuan Lalhleia duhawmzia leh a hmelthat ziate chu an han hrilh ta a. Chutih hua lai chuan darthlalang a la chhuak si lo va, Vuttaia chu a thau lai tak a ni bawka, ama zang pawh a hmu thei si lo va; heti hian a ti a, 'Hmara Sailo lal naupang hmeltha chumbiang mai leh ka zang ka hmu chak ber e' a ti hial a ni. Vanpuilala thih chuan a upa ten an uizia hla an phuah tam em em a, chung an hla phuah kan la briat rengte chu hengte hi an ni:

1. A fam ta e Liantlang rengpui, dokim sal kai-Kawikei hrang leh changsial sawm hlei (tu, Ngptosai hmachhuanin.

A farnu Lalsatpuuin a ban phuah ve a :

2. Ka pa, Lalngur, ka u Vanpuia,  
In za te'n e famkhuaah laitual in len,  
Ka riang mi hrilah.

A unau pa Vanhuailiana Champhai lalin a han  
phuah ve a :

3. A na lua e Laldanga awm lai vei,  
Tualpui pheiah Lai Dohiau pa,  
Zil ang min kove

A nupui Chawngpuituall phuah chu :

4. Suiblung lenin fam khua zu chuan ile,  
Sikhmel sensiar Laldang chul thein  
Ka ring love.

Vanpuilala thlanah chuan hlam thum bial zet  
tur bian lung an dawh a (Chin Lushei land by  
Lt Col' A.S. Reid pbek 21 para 3-ah chuan Van-  
puilala lungdawh hi feet 20 bial a zau, feet 4  
a sang a ni a ti). He Lungdawh hi 1934 March  
thia' khan ka han tlawh e, a la tha om em a  
ni. Chute Lungdawh chhuahzai "Tlawh Zai" a  
an phuahle chu bengte hi an ni :

1. Tur ni pui iang chawng chungnung in rawh,  
Suiblung kawng ang a yar e tahpuan khawnga  
Zia tin kai chiah e.
2. Lalchungnunga'n tangah bang lovin,  
Vengah han zer tang e luaithli nula  
Relthula kab chiah.
3. An ngai ngai love, Rihtlang liam hnu an  
ngai ngai love.  
Kawrfen thi leh Tian dar lo ngahak la,  
Rihtlang liam lovin.

4. Zanin leng ve maw, zanin leng ve maw,  
 Thlafam-rauthla zanin leng ve maw,  
 Khuangpui ri ngaiin.

Vanpuilala hi pate tawi, thau mum nalh mai a ni a, a zaidama, a khuate a hmangaiha, mite a tihrehawm ve ngai lo. A khua a zau ve, a khuate bian an duatin an chawimawi thiam si a, khawlai leng pawbin a vek chhuak zen zen ngam ngai lo zawk a ni. A khawlai leng an hmuh chuan upate khan, "E, ka pu ka inah lo leng rawh, belpui thlum sa ka nei a, i han khawn lawk teh ang u," tia lo kaibpen tum hi an tam thin a, a han luh a, zu an han inpui theih lah chuan an neih chhun chhun pawh nise. Vawk talh an hmang a. Tin, nula awmna te lah chuan an ina a luh phawt chuan an nula chu rim tum anih tekin an ti emaw ni, "Lal pu ka ni thei mah na" an ti a, kawng an khar a, an chhuah sen daih mai thin a, mahse tu fanu mah tihsual a tum ve ngai lo va, a nula ngaih emaw mi dang lake a fa neih emaw sawi a awm ve hauh lo a ni. Mi nun ngil tak a ni. (Hei hi Awithanga pa sawi dan a ni)

Fapa mel a ni bawk a, a hausa em em u, Si-lai pawh fung sawm aia tlem a nei ngai lo. Tin, Darbu sawm leh Darkhuang pariat a nei a, Sial sawm hlirin vawi thum Khuang a chawi hman a ni. Mizo dan pangngaiha chuan Zawh-zaw-zo a ni a, Ziu a dawh bawk a ni.

(1) Khawlianah hian mi hua'seo, mi hming-thang tak mai Burkhawni pa a awm a, an Zawlbuk sak niin, tlangvalho chuan a tluang an in zawh siak a; tlangval pakhat chuan Burkhawni pa hi a upa deuh ta a, zawh ve ngam tak ang maw? a ti a, a thian pakhat chuan, e, a ngam em em ang, zawh pawh a zawh liam ngam ang chu, a han ti a; mahse tlangval tam tak chuan "zawh ngam mah se, zawh liam em zawng a ngam bik lovang an ti e, an inhnial luai luai ta mai a. Burkhawni pa chu mi inhnialna te hribhin an va ko ta ringawt mai a, a han zawh ve ta ngei a, mahse Zawlbuk tlungkhum bakah chuan pen khatin a han pen leh pak mai a, a tla hlawm nah mai a ni. A van neih a siamin zu thi lo va le.

Heti ang chiah bawk hian Vawmtlak-a a lawn ngam leh ngam loh tur an inhnial bawk a, an han koh meuh chuan 'ngam lo' nih hi a dub lo hrim brim e, Vawmtlakah chuan a lawna a han pawt per leh mai zu nie. Hetah pawh hian a fung karah a tla a, a fung zumte chuan a toi thi hni hne chaub a ni an ti. Burkhawni pa chanchin hi mak tak tak a tem mai.

(2) Khawlian vang lai hian nula lian theih thawlh chak tak mai a awm bawk a, a chak zia hria te chuan a tar hnu pawhin en an awm fo thia. Naupang te kan nih laiin kei pawhin

ka hmu ve hman a ni. Ritphurh a chak a, hlo thlawh a chak bawk a, buhden a chak bawk. Fahthing fak za a phur zo va, Tuivai pòai atangin buhhum kawt khat pawh phur mah sel, kawngtluarin a ti ti thei a, ding chawl ve hauh lovin Khawlian tlang a thleng thin an ti. A hming chu Khawlnemi a ni a, Aizawl Electric veng a Pu Hnema C.A. nu saw a tunu (Khawlnemi fapa upa ber fanu) a ni.

Vanpuilala hian fa pahni chauh a nei, a upa zawk chu Lalhleia a ni a, a nau chu Lalziki a ni. Lalziki hian Cherkual lal a nei a, Fapa pakhat leh fanu pakhat a nei a, pasal a sun hnush chuan a fate nen a u Lalhleia an bel leh ta a ni.

## BUNG NGANA

**LALHLEIA :** Vanpuilala thil chuan a fapa Lalhleia hi a la tet em avangin an upate zing ami, an bawi lalte ni bawh Chawngkhuma leh Khawthangvunga te hian khawtlang rorelna lam chu an kai hruai ber a ni. Chawngkhuma hi a fingin a fel a, a huaisen bawh a, Lalhleia puitlin hma zawnga lal aiawha roreltu ber a ni. Chawngkhuma finzia leh khawtlang a hmangaih-zia kan hriat theih nan kawng khat chauh han sawi ila. Vawikbat chu lal ina zu chhim tura lo kal nu pakhat hi, upa zu rui, fiamthu duh

deuh mai bian "E! a mal a ver mang e" tiin a pawnfen a lo hlim sak a. Chu nu chu a thin ur ta a, lel leh upa hnenah chuan a khing ta a. Chawngkhuma chuan, chutia upa zu rui, fiamthu thawh mai mai han chawitir chu tha a ti si lo va, ama thian (Chawngkhuma thianpa) pa hnenah chuan heti bian a brilh ru ta a. Nakinah kan nu hi zu chhimia a lo kal ve ngei ang a, a pawnfen lo hlim s k ve la, kan nu thin ur chuan lel leh upa hnenah a sawi ve ngei ang a, chumi hnenah chuan tun ami nen bian kan la ngaihtuah rual dawn zu nia a ti a.

Chawngkhuma nupui chu lal ina zu chhim tur chuan a lo kal ve ta ngei mai a, mahse, mahni phawk vang mais thiente nupui pawnfen han hlim sak kha a hreh ble a ni ang chu, a thianpa Chawngkhuma thurawn ruk dan te kha a hre reng a ni ang, "Chawngkhum dân tlang huat loh" tiin a hlim sak ta a ni.

Chawngkhuma nupui thin ur chuan thu buai ah a la ta ngei a, a hmasa neo khan an ngaihtuah rual ta a. "Upa zu rui fiamthu mai a ni e, in ngaidam tlang ang u" an ti ta a ni. "Chawngkhum dân tlang huat loh" tih bian Mizoram a deng chhuak ble a ni.

Lalhleia chu a pa thih hnu chuan Vanbawngah a kai chhuak ta a, in 500 vel chauhvin an



zui a, an khawabawl upa Pachuais, Thahdo ho-  
vin Khawlianah hian hmun nghakin an la hou-  
fual a, hetih hua lai hian "Hmar Vailian" an  
tih mai kha Senvawo lam atangin an rawn  
chho va, Khawlianah Krismass an rawn hmang  
a, tlangvalho chuan rei lo tê an lo kap a, mah-  
se, Vanpuilala nu Lalhlupuii ctuan kum 1850-  
ah Sentlang khua, vaiin an halsak tuma an in-  
remna thuthlung avang khan kah zel a phal ta  
lo va, Lal piter thu chu awiin an kap zel ta lo  
a ni. Tichuan, Sipai ho pawh chu Pawibawia  
khua Selam panin an kal ta a ni. Hemi tuma  
Sipai hotu lian zinga pakhat chu Capt. Robert  
a ni a, nakin hnu lama Lord Robert lo ni ta  
kha a ni.

Vanbawog atang hian an thlang lawka Ratu  
ram pharh duai mai chu insawn chhuk nan an  
it thei em em a, upa thenkhat leh tlangvalhote  
chu a hmuna zu bel chiang turin an kal tir ta  
a. Chutih lai chuan a tlangdung tluan mai  
sawn Rua leh Mau te chu a tukhup mai si a,  
ram zu fangtute chuan "E! a na pha ngei mai,  
a tangdung tuanin rua chu, rua chu, a tukin a  
tu khup mai hi" (E! a lo tha ngei mai, a  
tlangdung tluanin, rua chu rua chu, a tukin a  
tukhup mai a ni) an ti a. Tichuan, an kai chhuk  
ta thuai a, chu chu kum 1877 lai vel kha a  
ni. An khaw hmingah chuan "Rawtu" an vuah

ta nghe nghe a, chumi awmzia chu Raw tamna tih ang a nih chu, mahse, tun hnuah hi chuan Ratu tia briat a lo ni ta.

Ratu aţang hian a chhim lam mel li lek Sailutarah an insawn chho leh ta a. Heta an awm lai hian Thingtam hmasak 1880 kha a lo thleng ta a, Lalhleia chuan Thingtam hi chuan fa pahnih a nei hman tawh a ni. Lalhleia hi palian tawk tek a tling a ni. A san lam chu ft. 5:4 inches a ni a, a awmah erawh chuan sum ruk zet a tling thung a ni.

Thingtam hma kum 1877 vel aţang khan Lalpuiliana thlahte leh Mangpawrha thlahte inkarah buaina a lo chhuak a, an indo phah ta hial a, chu chu "Chhak leh Thlang indo" an vuah a. Indo chu a lo zual deuh deuh va, Manga thlah ami Lalsetpuii pasal Thangbulha kbua Buallawn pawh chu Liankhama Vangte khaw lal chuan a rawn run a; Buallawn chu an darh zo ta a, Thangbulha chuan a chhak Sailutar khuaa awm Lalhleia chu a rawn bel ta a, mahse Lalhleia chuan a nu kova awm, a khawper Hnahsepah chuan Thangbulha chu a awm tir ta zawk a. Thangbulha hi a zu ruih te a chhe deuh va, Lalhleia nu Chawngpuituali chu hmu-sit takin a tibuai thin a, Chawngpuituali thinur chuan a vahpa Pawibawia a va hrilh a, Pawibawia Zawngina awm chuan Darkhuma hovin

upa a rawn tir a. Thengbulha chu an va man a, rei tak Zawngin-ah hian an tan tir a ni. Thingtam dawn avang khan khawtin mai chu an buh sazin a seh a, buhseng tur pawh an nei dawn ta hlawm lo va, nasa takin harsatna an tawh theuh dawn tih an briatin Khawchhak lam lalte leh Khawthlang lam lalte chuan inrem-na siam an rawt ta a. Lalhleia khua Sailutar-ah hian an intawkkhawm ta a ni. Hnasepah hian khawthlang lalte leh an thuihruaite chu an awm a, Sailutar-ah hian Khawchhak lalte leh an thuihruaite an awm bawh a. Ni thum lai an iobiak hnua chuan an inrem thei ta a, Sa-ui an tan ta a ni.

An tihdan chu Ui an talhe, a thin leh a lung chu an zu khawn turah khan an chiah a, Lalho zu khawn turapiang chuan an khawn hmain hetiang hian cubia an chham hmasa thin a ni. Khawchhak lalte chuan "Khawthlang lalte ka kah leh tak a leh ka zu khawn hian ka thin ka lung deng thla rawh se" an ti a, an khawn ta a. Chutiang bawkin chhechhamna kha an nei hmasa zel a ni. Khawchhak lal leh Khawthlang lalte kha inkarthelbin an inkhawn chhawk a. Lal hovin an khawn zawh chuan an upate ve ve khan chhechham hmasa zet zel bawkin, khawthlang upate leh khawchhak lam upa te khan inkarthelb zel bawkin an khawna, chu mi zu khawn kim vek hnua chuan remna thu chu an puang ta a ni.

Heng an inbiak chhung hian Khawchhak leh Khawthlang lalte khan an inbiak rem theih loh pawha inkah mai peih diamin an awmna ve ve lamah chuan an iorin tir thup reng a, an pasalthate ve ve chuan an tlangvalte tanhmun kha an kan lawr zat zat ve reng bawk a. Chuta tlangvalho in ep tuar reng mai chu a hmu phakte sawi dan chuan a rapthlak ble mai an ti thin. Chuta an Sa-uitanna hmun tak chu Silutar leh Hoahsep inkar kawh hi a ni a, tun thlang pawhin Sa-uitan kawh tih hming a pu hlen ta a ni.

Thing chu a lo tam ta a, Vaihovin Tuiruang dungah sawn buh an rawn tawih chho thin a, chumi hoah duh avang chuan Lalhleia chu Chengkawlawh-an sawn a kai phei ta a, vaibuh an ring ta ber a ni. Hemi Thingtam lai hian a fapa upa ber Lalthualuaia chu a piang a ni. Hetih lai te bi chuan tuman pawisa nei nek lo, Vaihoh buh thlangna turin Vangai tlangah sawn thelret an va hnei thin a, Vangai tlangdungah sawn tumah an la awm si love, Sa a tam em em mai a, ramchhuahna tur pawh an va hman na ber a ni bawh. Chutih laia an pasaltha hmingthang deuh deuhle chu Mangsawma, Pathanga, Lalbana, Puhleia te an ni. Vawikhat obu Mangsawma bovin thelret an hoai a, tlangval pakhat a ler sang bers awm chu Sikein a rawn la ta mai a, Mangsawma chuan a umzui

vat a, Sakei meiah chuan a chelh a, a hnung zangah a han sat ta a, Sakei chuan a tâwng ve ngam reng reng lo, a sat hlum ve ta der mai a ni an tl thin.

Tin, an Saikah nghote chu Vai hrenah an an hralh a, buh lei nan an hmang thin a ni. Lalhleia chuan Vabawnga an awm lei khan Vailian kha a kah ve loh avangin Silchar Borsap pawh a lawm hle mai a, "Kan fapa Lalhleia" tiin a sawi thin a ni. Chuvangin, Tuiruang leh Tuirial dunga Thing leh Mau chhiah zawng zawng pawh hi Lalhleia'n nei vek rawh se a ti a, a pa Vanpuilala ram panggai Vawklian lui a chin chhak lam zawng zawng chu chhiah a lak tir vek thin a ni.

Chutia Sai leh Sa dangte an kah fo avang chuan hlado te pawh an phuah belb nesa hle a, chung zinga kan la hriat rengte chu :

1. Sailian e khek chel chul law,  
Hmingtha Laldanga than nan e.
2. Dawnlung e ngir hmunah khan,  
Samtha usi hniang mi hmuak ulaw.
3. Tuipui e lianna hman se,  
Vala ka lungphang na hlah maw.
4. Maimawm e runsa bang e,  
Valan e chawnbaw ka vawr siau ve.

Thingtam lai kha anih avangin Iodona pawh a awm lo va, an zalen hle a, ramchhuah an usar em em a ni. Amah Lalhleia ngei pawh

hien Sei a kap ve a, a kahna hmun pawh Ti-  
paimukh atanga Tuiruang hnar lam han hawi  
chhohva, dinglam panga kawrite lo chhuak Hmar-  
cha lui an tihah sawn a ni.

Thingtam te a lo reh fel ta deuh a, Hmar  
leh Paihte ho khan an rawn bei leh ta mai a,  
Chengkawlawn atang chuan Thingsatah sawn an  
rawn inawm phei a, tin, an chhak Lungsumah  
sawn khawper in 40 vel chu a nei bawk a,  
chumi te chu Sukte ho khan an rawn run ta  
ngei a, mi an that tam blo a, an nu naute pawh  
an man sak nual hlwm a, Sukte pakhat erawh  
chu khawchhungah chuan an lo that ve a.  
Thingsat tlangvalte chuan an briat veleh chhan  
turin an tlan chbo yat a, Lungsum an thlen chhoh  
chuan ral chu an lo kiang hman tawh a, mahse,  
an umzui ta zel a, Senvawm tlangah khian an lo  
tlan khalh a. Lambuna lo thah vek theih an  
inrin teh lul nen an hotupa ber Mangsawma  
chuan "ka zu enthla tang e" a ti tlat mai a, an  
hnial ngam si lo va. Sukte ho chuan Bawbhla  
an rawn chhem chho rawi rawi mai a, Mang-  
sawma chuan a lo zu kap fel ta mai a, a thianto  
ho khan an zu puih chuan ralte kha an lo in-  
ring fel ve hman a, tanhmun an lo la fel ve vek  
hman a, zanriah chhum hun vel atang hian an  
inkap ta a, Sukte pahnih chu an kap hlum a, tin,  
anni pawh chuan an pasaltha Publaia an chan  
ve ta a ni. Khuain a lo thim hnan ta a, a tuk  
tuk zingau chuan an intha then ta a ni

Hetia Hmar leh Pailte te nen an lo intai tâk avang hian mahnia hla teka awm fal chu thain an bre ta lo va, a pa Pawibawia, Khawruhlian a awm chu a va hnaih phei ta a, Thingsut a tang hian Khawruhlian chhak Khanpuiah khian a kai phei ta a ni.

Khanpuia an awm hnu hian Hmar ralin an rawn run a, mahse an lo inria ve hman avangin an um let ta a, Chalfilh tlang chhipah khian an umpa a, an iokap ciam a, Hmarho chu an tlan chhe ta a, Silai pakhat pawh an tlan san a; an pasaltha Zakhama'n a nei ta nghe ngbe a ni.

Khanpuia an awm lai hian Vai a lo lian leh ta a, chu chu Pastor Liangkhaia sawi danin kum 1890 a ni. Khawthlang lalte chu an rawn hneh chho va, Kalkhama khua Sentlang pawh an rawn hal sak vek a, an rawn chho zela Khawruhlian leh Khanpui pawh an rawn hal vek a, buhseng hnu lai tak a ni a, an buh seng turte chu Sipatin an vaw til vek a, an in an hal sak vek tawh bawk si a, an mang ang em em a. Lalbleia chuan a khuate hnenah chuan "Tuipui kam phai ram thaah chhuk ila, fur thlaite a lo thar hma deuh anga, kan nung thei ber ang e" tiin a rawt ta a; tichuan Kelzam ram khu fai-ip chawiin an zuan ta chawt mai a ni.

Hmanlai chuan Sailo lalte hi chu an thihin phum ve mai an ni ngai lo va, Kuangah an inur zet a, an luruh leh an sam te chu puepin an tuam e, thul chhungah an khung a, tui-upi hunda kiong tui chhuarah bian an hung thin a, Mimkut thla apiangin kumtin an phawrh chhuak a, sabriak te an thih thin a ni. Chung rubrote chu an chhungte thi houhnung ber rubro dang phum rual khan an phum ve chauh thin a ni.

Lallianvunga thlahte erawh hi chuan, an pian tlem em avang hian Pathianin min khawngah ang a, kan piang ve deuh mahna tih beiseiin an inphum bo ve mai phal lo va, an kawl khawm reng thin a ni. Amaherawhchu Khanpui chhuahsana Kelzama an chhuk dawn bian Lalbleia chuan "Kan rethei ta em mai, mitthi kawl tlak pawh kan ni ta lo ve" a ti a, an thlahtute lu ruh ro an la kawl zawng zawngte kha a phum ta vek a ni.

Hemi du rubro an phum khawmna chungah bian feet 20 bialin lung an dawh a, feet thuma sung a ni a, a chhipah erawh chuan feet 18 bial a ni. He lungdawhna balah bian Khanpui khusin Field an aiam dawn ta a, lungdawh chu thlang pha dawain an inhris a, Lallianvunga thlahte chhuah Lungdawh leh chuta rubro phumte chu sawn an rawn dil a. Khanpui khawlai amun thalai takeh an sawn sak ta a ni. Chu lungphunah chuan heti bian ziak a ni:



# THLAHTUTE HRIATRENGNA LUNGPHUN

He Khanpui khuaa an awm lai kum 1890 khan kan pa leh pu duh tak Lalhleia Ratu Lalin kan thlahtute lu rubro a phum a. He hmun ngeiah hian he Hriatreogna lung hi phun a lo ni ta a ni.

Lu rubro phumte chu :

1. Lallianvunga	Lallula fapa 2-na
2. Roliani	Lallianvunga nupui
3. Lalgura	" " fapa 1-na
4. Ropuithanga	" " " 2-na
5. Lalhlupui	Lalgura nupui 1-na
6. Picheri	" " 2-na
7. Vanpuilala	" fapa 1-na leh Lalhleia pa
8. Hrathleia	Lalgura fapa 2-na
9. Lalnemi	Lalhleia nupui 1-na

Hmar tlang ram nuem lo humhimtu,  
A ngur chhungpui fam zawng zawng;  
Kan hriatreogna a chul dawn lo,  
In rolung kan chei leh e.

Phuntu'e : Lallianvunga thlahte leh  
Y.M.A. Khanpui Branch

Phun ni : 22 March 1986.

Tin, be lungphun bi Assembly Speaker Dr. H. Thansanga'n a hawng a, Aizawl milian leh mi pawimawh tam takin an fawiawm a, in-khawmna leh ruai thehna ropui tak a awm bawk.

Kelzamah hian kum thum vel chauh an awm a, a chhek Hmuizawlah hian an kai chho leh ta a ni. Hetah pawh pawh hian in 300 chu an la tling a ni. Hmuizawla an awm lai hian taksa lamah chuan Lalhleia bi a vanglai tak a ni an ti thin Kan sawi tawh ang khan a dunglam chu sang em em lo mah se, a taksa phêng a hlai a, inbuan te a thiam bawk a, a chak em em a ni. Szizihawla pawhin "Lalhleia ka buanin ten dan tawh ka thiam thei lo ber, tha ka thlah deuh chuan mi la si a, ka han tih ve chian chuan mi hneh lo deuh si a" a ti thin a ni.

Vailian chuan Mizo lai zawng zawng chu an man a, Aizawlah an breng a, Lalhleia pawh thla khat vel chu an breng ve a ni. Hmuizawla an awm lai hian Se sawmin khuang a chawi a, tin, Vailian an rawn chhuah leh hnu chuan Sawlengah a kai chho ta a, hetah hian Khuang a chawi leh a, tuah chuan a fapa upa ber Thuamluaia pawh a lo tlangval tawh a, thil pawimawhah chuan a pa ei a awn thei vek tawh a ni. Sawlenga an awm lai hian in 200

vel a ni a, Sawleng ram hi a tha e, buh leh bal a tam a, Sechhun, Khuangchawi, chawn leh lam tuah rel an tam a, nuam an ti em em thin a ni. Vailian kha an tin ta lo va, a ram pum pui pawh hi Borsapin a awp fel tawh e, Silai te pawh Sorkarin a khawn sak vek a ni.

Aizawl Borsap leh Manding Sap chu Manipur biala Silai namber nei lote lakhawm turin Sipai tam tak hruiin an rawn chho va, hmawr pheia lal lian deuh deuh chu anmahni zui turin an phut vek a, "Min zui duh lob chuan in ram hi min zui duhtue hnenah kan pe ang tiin an va va. Lalthleia chu anmahni zui tura tib a ni bawh a, Tuiruang thlengin a va kal ve a, chuta tang chuan a fapa Thuamluaia chu a ai-awha kal turin Borsap chuan a phal sak ta a, tichuan tuna Lalthleia leh a fate awm-na ram hi Sorkarin a pe nghet ta a ni.

Mizo lal Thuamluaia, Vanphuoga leh Thangkama te chuan Borsap chu an zui ta a, Manipur bial Aibulawn te, Parkhuang te, Hmawngawn te an va thleng a. Hemi tuma hmar zinbo te hian dawi an hlau em eni a, an upa bruai tam tak pawhin zana te hian an hawn ruk san leh thin a ni Thuamluaia pawh hian a tirah chuan upa 30 lai a bruai e, mahse, a tawp thlenga zui ngam chu Ponga (Kepiana pa) leh Zatuata (Kawlbawia pa) te chauh an ni. Chu-

vangin he mite pahnh hi chu an dam chbung-  
in Kuli an awl tir ve ve ta a ni. Tin, thlawh-  
hma lekna lam thuah pawh an duh lai lai an  
neih tir thin a ni.

Hemi tuma Hmarho dawi an hlah em em  
mai, a ven dan tura upa lo ngaihden chu  
hetiang hien a ni: Mi khua an luh dawn apieng-  
in an kawtchhuaha kalkawng lai tak, mite rahbel  
tlatna hmun lei kha, an cho khawh a, saiblum  
tiat vel tur hi tui tel lovin an dawh thin a ni.

Hemi an zin hawn hnu hian Borsap Tarmite  
(Col.Shakespear) chuan ram lehkha a pe ta a,  
chuta an ram ri chu: Kepran tlang sang lai  
tak atengio Tuivawl leh Tuirial inker ram zawng  
zawng leh, Tuiruang leh Tuirial inker ram  
tawp thlengio a pe ta a. He ramri lehkha hi  
kum 1926 khan a fapa Ngurlian'n Aizawla leh-  
kha a zirlain copy that turin Pu Chbinga  
(Chbing khawl chhua) hnenah a pe lut a, van-  
duathlak takia a lo tih bo sak ta hlah mai  
a ni.

Lalbleia fapa upa ber Thusmlusia hnenah  
khan Hmuizawl tlangdung zawng leh Kelzam  
ram nei turin Borsap chuan lehkha a pe ve leh  
ta a, chu lehkha chu tun thlengio a fapa upa  
ber Lalzama'n a le vawng a ni. Tin, Thusm-  
lusia nau Hranglunga pawh kha tlangval a lo  
ni ve tawh biwk a. Hranglung khaw siam ve

nan tiin Borsap chuan Vanbawng leh Khawlek  
 ram zawng zawng khi a pe tel ve leh ta bawk.  
 Hranglunga hi mi zakzun, mi nungchang tha,  
 pate bula awm a, pate thu-awh thiam em em  
 a ni si a, amah hi zai a thiamin, bla phuahte  
 a thiam bawk si a, a pa chuan a ngaina em  
 em mai a, ram hla taka awm pawh a phal ta  
 lo va, Vanbawng tlangah pawh chuan a kai ta  
 lo a ni. Hetia Borsepin Kepran tlang sang lai  
 tak atanga Tuiruang leh Tuirial Inker ram  
 zawng zawng a pek tak avang hian an lawm  
 em em mai a, kan upate chuan hetiang hla an  
 phuah ta a:

A tlang tluonin Laldang tukram a ni e.

Ngur bel lo chu ar ang vaih an hma chhuan e;

Haw rawh thian a, i kai ang tlangdum durah.

Ram an tih fel hnu chuan Lalbleia chu Ratu-  
 ah 1902-ah khan a kai pheih leh ta a. Ratu-ah  
 hian Khuang vawi hnib a chawi a, zau a dawh  
 ta bawk a; tin, PUMA ZAI kan tih Mizoram  
 deng chhuak vek khawp; hmingthang hi Ratu  
 khua atang hian a lo chhuak ta a ni.

## BUNG RUKNA PUMA ZAI LO CHHUAH TAN DAN

Thingtem zawha Thingsata an awm lai khan  
Lathleia khua ami Saibanga (Brigadier Vaikhuma  
pu) leh Chawgruma chu an thian dangte nen  
Tuirial dungah hian Mau an zu tawlh a, chumi  
tum chuan phaikin vela Khawchung kan tih  
mai ho khuaah khuan an riak a, zana thla  
êngah chuan naupang tualchai hote chuan  
hetiang hian hla an rawn sa a :

Rit kai rawh, chawm khuang beng, leng  
kel vun,

Puma eldawng, dawng ruai a, tih te leh  
Vaikel hnute reng in sawr naw rawh,  
Puma, eldawng dawng ruai a.

Heng naupangho tualchai hlate hi mau tawlh-  
ho chuan an zir ve a. Thingsat an rawn thlen  
chhoh hnu te chuan an phuah belh a, hla fiam-  
ah an hmang a, an sa fo thih a; mahse, miten  
an hlut pui ve vak lo a ni ang chu, a reh leh  
ta daib a. Khaw rei fe hnuth Ratua an rawn  
awm leh hnu hian pitar pakhat Darpisiaki  
(Denga nu) chuan a naupan laia an sak te kha  
a la hre reng a, chung hlate chu nau awih nana  
hmangir a sa fiam thih a, chu chu tlangval  
bovin an chawilar ta a, an phuah belh a,

**PUMA ZAI** an ti ta a ni. Chuta an phuah belh hmasak chu hengte hi an ni.

1. Tuizal chakaiin a daih dawn lo, puma,  
Hangi nu ban reng a zen rawi rawi, zen  
[rawi rawi.
2. Ami tar chawm.tualah leng der e, puma  
Chawngpuiliana tar khawi tualoh leng  
[thei lo, leng thei lo.

Tlangvalho chuan bla fismah an hmang zel a, an duh em em a, khawlaiah te an sa rual tuar tuar a, an lo uar telh telh a, ban an vai suau suau va, muala lam chhuah nan te an hmang a, nuam an ti em em thin a ni. Mitinin lâmma bla takah te an hman theuh hlawm tak avangin nakinah phei chuan "TLANGLAM ZAI" tiin an vuh ta zawk a, an phuah belh zel a, hetiangin :—

1. En rawh Lalchingkin ka mawi emaw,  
puma,  
Kan khaw tleitir banvai mawi ka lawm  
dawn e, lâm dawn e.
2. Lalchingkina ka ven a tul e, puma,  
Sebawng leh mel kei ka veng ngai lo,  
veng ngai lo.

Chuta tanga hun rei vak lovah chuan Zawng-in khaw lai Lalzikan 1908-ah khan chu Tlang-lâm Zai chu Sialin a ai ta a, chuta tang chuan

Mizoram hmun tinah bian Tlanglam Zai chu a lo darh ta chum chum mai a ni. A darh zau chak em em a, Lal dangte pawhin ropui tak-in an lo ai ta zel bawk a, khaw tin maiah bian nula tlangvalia mualeh an lampui a, hnahchhawlte an keng a, an vai a, an inzap suau suau thin a ni.

Lalhleia hi Sawlenga a awm chhung leh Retua a kai hnu thlang pawhin khawtlang enkawlna lama mi tangkai leh a thusa ber berte chu Mangrawnga leh Rophunga te an ni. Mangrawnga chuan fapa pahnih a nei a, Sawldara leh Dahrawk Buana te an ni. Sawldara hi tun thlengin Darlawnah a la awm a. Mizo Union chhuah tih khan a lo zawm ve a, Union tum dan pawh hi ram leh hnam tan a tha ngei ang tih a ring a, mahse, Union nawrh laia Lal ensan tur tih thuah kha chuan hetiang bian a sawi: "Kan lalte hi rilzamin lo awm ta sela, a ei bika han tang thei kan ni lo ve, an zar kan lo zo rei ta em mai; kei zawng min bre thiam ang che u" a ti a ni. Membur dangte pawh chuan an hre thiam a, a nuar ve ta lo a ni. Tin, a nau Dahrawk Buana pawh bian kum rei tak Sorkar hna a thawh chhungin, amah hi Dahrawk hial a lo ni bawk a, mi mangang leh tanpui ngai tam tak a tanpui a ni.

Rophunga pawh bian fapa pahnih bawk a nei a, Pu Maia of Chaltlang leh Pu Thausanga



of Kolasib an ni a, an hun tawp thlengin khawtlang tana mi tangkei leh roreltu an ni ve ve a ni.

Tuisual rala Hmarho, khaw hrang rawn thuta awm ta te reng reng hi a tirah chuan Lalhleia khawper tura lo lut vek an ni a, an zingah hotu a siam sak vek a; amaherawhchu, Lalhleia hnenah chhiab an pe vek thin a ni. Hetih lai hian Sorkarin Aizawl atangin Tipaimukh thlengin Lamlian a rawn zawng ta a; mahni ram chin theuh lamlian chu Sorkarin lai turin thu a pe a, a khat tawkin lamlian tlangdungah chuan Bangla an rawn sa ta vek bawk a. Chutianga Bangla awmna apiangah chuan Melveng leh Bangla awmpuite siam a lo tul ta a. Lalhleia fate zingah chuan Thuamlusia leh Lallunga chauh hi puitling an la awm si a, anni lah chuan Tuisual rala va awm ai chuan zo sang zawk leh hmun nuam zawk chu an thlang a, an va awp peih si lo va, a hmuna va awm-chilh loh chuan rorel a lo harsa ta a, Khawper hotute chuan a rukin Sorkar hnenah Tlang lehkha vawng ve turin an dil ta a, Sorkarin a lo remtih sak ta a ni. Chung khawper hotute hnenah tlang lehkha an lo pek te chu an thih hunah chuan a ram neitu pangngai Lalhleia kutah ram chu a awm leh tur a ni, tiin Sorkar chuan an lehkhahu puiah an ziaik nghe nghe a ni.

Lalhleia chu re fê Ratus a awm hnuah, Bualawn tlangah khuan a kai chhuk ta a, Bualawn khuaah hian December 12, 1939-ah khan kum 80 mi niin a boral ve ta a ni. Lalhleia hian a pa thih hnuin khawthar vawi li a sat a nih chu. A dam lain Khuang vawi li a chaw i e, Sakei vawi sawm a si e, Mizo dania zawh-zawzo a ni e, Zau a dawh bawk. Buallawna an awm hau hian Retu tlangdung hi a thlir a thlir thlin a, a lung a tileng em em thlin e, heti hian hla a phuah ta a :

Ratu pui khi ngaih zawng zawng leng an  
tuanna,

Ngilh ni reng reng a awm dawn lo;  
Tlangnuam leng pan a ti e.

## BUNG SABIHNA LALHLEIA CHANCHIN DANGTE

Lalhleia chanchin dangte han sawi leh lawk ila. Kan sawi tawh ang khan Vanpuilala khuate hi Ralte hlang blak kha an ni e, Ralte ho hi tunleia English mi ang deuh khu an ni e, an lalte hi an chawinawi thiamin an duat thiam em em mai a. Lal buaisen leh lal nunnem, lal hmingthang Lalsavunga fanu an Lalnu atana an va zawn chhuah Chawngpuituali chuan a fa tirah mipa a rawn bring ta hlah mai a, a

hmingah chuan Lalhleia an sa ta a. Nu leh pate chauh kha an lawm a ni lo va, an khaw mipui chuan chu lal fapa lo piang chu an lawm tak zet zet a ni. A bawrh keu chinah phei chuan nula leh tlangval thleng pawh hian lal fapa duhawm tak mai lo piang chu nitin bian a en turin an kal huai huai thin a, an han hmuh meuh phei chuan a duhzawng leh a ei theih zawng han zawn sak hi an chak a, a entute chuan "Aw i ha na chak thei ang" (Aw engnge i ei thei ang) an ti a, a ei theih tur han zawn sak te hi an chak ngawih ngawih thin a ni an ti.

Hman lai chuan hmeichhe tam zawk hian hmar-âm hi an feng a ni a, an pawnsen chu puan panggai ai chuan a lo thap deuh zawk bawk a, an lal fapa chu an pawm dawn hian, an pawnsen thap khan a nawt na ang tih an hlau va, a pawmtu apiangte chuan an pawnsen chu an hlim zel thin a ni. Amah pawhin beti hian a sawi thin "Lian tak ka nih thleng pawhin kan chhungte (chhiahhlawhte) chuan min pawm dawn hian an pawnsen an hlim ziah thin, khawlai ka lei theih hnu thleng pawhin, mi pawmtu tur chuan pawnsen blimna chang bre lo reng reng an awm lo" a ti.

Hman lai chuan lal ropui deuhthe chuan fapa an han neih hian, an lal fapa chuan chbawn a neih ve theih nan, ral thah sak tur zawngia an

khaw pasalthate kha an rammu thuai thin a. Lalhleia lo pian pawh bian an khaw tlangval pasalthate chu hmar lamoh leh chhak lamah an rawl ta vang vang mai a, mi pawh an rawn theh sak ve ve a; tichuan, Lalhleia kha nausen tê mah nise a ral thabte chu Sialin an aih tir a, an muslim pui dup dup mai a ni.

Lalhleia hi a hmeltha bawk a, a pian hmang rengah pawh a kutke ban invuah vel dan leh a sakruang lan dan reng reng hi a invuah dik zat vek a ni e an ti thin. An sawi zelnaah chuan heti bian an ti bawk: Palian tak si, a pian thiam avangin pate deuh lam zawk hian a lang nalh zan thei a ri an ti bawk. Hmai bial deuh, hnar bang sang deuh leh hnar zum deuh a ni a. tin, a bengvuah leh a tukkhum sam zialna hi an in chuktuah mawi rem thlap vek a ni an ti bawk. Ratu atanga Buallawn an kai dawn te hi chuan kum 50 chung daih a ni tawh a, mehse, nula pakhat chuan hmeltha a ti a, a la ngaizawng thei a ni ang chu heti bian bla a. phuah a :—

Sawi tam leh tlangrel chu dawn lo la,

Kawlhrei bata siahthing tang ken lawr dawn  
chuan,

Thiani Lalhmelthaa sawm ve rawh.

Mikhual zin veivakte pawh hian “Suakhnuna (Tachip lai, Kamliana pa) leh Lalhleia hi chu an hmeltha mang tak e aw” an ti vawng vawng

þhin a ni. Tin, zai a ngaina a, hla lunglengte hi an hre tam em em a, mi hla thluk emaw hla thu emaw lo tih danglam sakte hi a huat zawng tak a ni e, a ching ve ngai haub lo. A aw rawl chhuak reng reng hi a mawi bawh a, zai a thiam em em bawh a ni.

Tin, nungchang danglam tak pawh a nei a, chu chu a puithu em em na hi a ni. Ama sawi dan chuan "Keini thlah hi kan piang tlem em mai e, kan thlahtute, kan nu leh pa, kan pi kan pute khan Pathian lawm loh zawnga awmna te an lo nei a ni mah na; chuvangin, kei chu kan lo pian ve theih deuh tawh nan ka theih tawpin ka puithu dawn a ni" a ti þhin. Puithu tih swmzia chu Pathian duh loh zawng nia an rin apiang chu an ti lo ve, an ei lo va an in lo ve, an sawi lo ve, Pathian lawm zawng nia an rin apiang chauh an ti þhin a ni.

Lalbleia puithu dan þbenkhatte chu han sewi ila :

1. Khua a hel duh lo. Kawtchhuah leh lam atangin ram vakin liam se la, a liamna kawtchhuah lam atang lo chuan khua a rawn lut duh ngai lo.
2. Hriambrei emaw, dan naranin thir lam chi reng reng mi kut atangin a la chhawng ve mai duh lo, leiah a han dah tir e, chuta tang chuan a la ve chauh þhin a ni.

3. Kawngkhar a lubin a ke dinglam a penlut hmasa anih chuan a chhuah leh hunah pawh dinglam bawk kha a pen chhuak hmasa leh thin. A ti sual palh anih pawhin a hnung zawngio kawngkharah khan a tawlh lut leh a, inhhunga sutpui bul atang khan a va tan tha leh a, a rawn kal chhuak leh chauh a ni.
4. Kalkawnga a kal laiin a dailen chhuak ta sela, kawog thlang lamah a daileng duh ngai lo. Kawngchhak lamah mi zin veivak tana hnawksak hauh lohna tur hmunah a kal a; tin, a ek chu a chhawichhin ziah thin a ni.
5. Zu siam turio emaw ei rawngbawl turio emaw mi piangsual lam reng reng chu (entir nan : mit khiingdelte, kutke kim lo emaw tam lutuk emaw pawh) a hman ve duh ngai lo.
6. A hriat phawt chuan Sakei seh emaw, Setlaw emaw ki reng rengin zu a in ve duh ngai lo. Sakei vunah pawh a thu duh lo.
7. Khawlaiah meihawl te, lampei te a rap duh ngai lo. Lo rap palh anih pawhin a kal chhuahna kailawn bul atang khan a va tan tha leh mai a ni.
8. A zin dawnio kawtchhuah a pelh hmain lo inhhuih palh sela emaw rin loh takin leiko rappelh palh thut ta sela, a zin tur a kir leh a, ni hmanah a chhuak leh zawk thin.

9. Ran nung reng reng, ar savatak ngial pawh a thlawna talh chu a duh ngai lo, an then-awm naupang emaw a kiang hnaia naupang awm emaw a kova, arthlazah a thawi nan tal a hmanh a, a talh chauh thin.
10. A zinnaah emaw ram dangah emaw reng reng a ha te, a tir te, a hmul te lo thlawm-in lo til path ta sele, a fun tha a, in ah a hawn a, muangchangin "Pu Vana, ka ba chhia/tin chhia/hmul chhia leh i ha tha in thleng ang" tiin sut âwngah a thlak thin.

Tin, a nungchang thatna dangte pawh han sawi leh ila :—

1. Zu a rui chhe ve ngai lo Rilru mit khawp leh kalpai tawag tawag khawpin a rui ve ngai lo reng reng.
2. Zu hmunah zahmawh leh thu bawnra pui pui nena rik hlutte hi a huat zawng tak a ni. Mi inphuah elna hla sak te, hla zahmawh lam sak sak reng reng chu, a telvna hmunah phawt chuan tih ngam a ni ngai lo. "Mite icduhna, inngathnatna leh inchawimawina lam hlate sak sen lohvin a awm" a ti mai thin a ni.
3. Hmeichhe kiangah emaw hriatah emaw chuan zahmawh a sawi ve ngai lo reng reng a ni.

4. Thiangblimna a ngaisa em em a, kawrbat  
leh puanbal pawh a inbel ye ngai lo. In  
chhung leh sumhmun thleag thlenga phia  
phiaat mi a ni.
5. Mi themthiam tak a ni a, Mizo khawsakna  
hi chu siam thiam loh a nei lo. Haangtal  
lamah pawh Kawkpuizikziel leh lenbuang  
thuum thlongin a tah thiam ve vek a ni.
6. A khumpui dawk sak turin emaw siam the  
turin emaw chuan mi ziktuak tak, mi hmuil  
ngil tak, mi piang chhung tak chauh  
hmang duh a ni. Mi nun ngil lo, tual thar  
tawh hnu te, ruk ruk hmang te, an tu leh  
fate thleag pawhin a hriat chhuah phaw  
chuan a hmang duh lo.
7. Sial hi mibring dawttuah a ngai a, a zah  
em em a ni.

Mi lungleng thei tak anih ayangin amah ngei  
pawhin bla phuah a ching ve ble a; chung ama  
phuahthe ngei bla kan la briatte leh miten amah  
an phuahna te leh a bla dubzawng hrim brim  
te nen han sawi ila.

**Thlawh Zai (Lungdawh chhuah zai, ama phuah)**

1. Kan Zawl khawpui ngihh ni awm love,  
Thai ni tla sen siara, khuangpui lamsâr;  
Kan yel lei ve kha.
2. Zawl khawpui khu kei zawng ka hawi  
ngam love,



Kulva chang nen Chalogeng rauthla;  
 Kan awin lai kha ngai ing e. (Zawl khawpui  
 a tih hi Hmuizawl khua a ni).

**SAILO ZAIA A PHUAHIE** (Sakei a aih tuma  
 a phuah te)

1. Kan ri khum khum, kan ai bung bung,  
 chinlaiin lo ngai rawh u,  
 Sawltlang zopui kan sumtualab;  
 Zia tial pui hi kan lam e.
2. Zia tial pui leh Laldanga hi kan inmawi  
 reng reng a e,  
 Min chuan ula, naufa lengin;  
 Chhimbu leh peng peng sa in.
3. Min chuan ula, khua vel kan chinleia te.  
 Sawltlang khanthum mual a kûr e;  
 Lallai a dawl dawn lo ve.
4. Dar a ri e, kan Tuaichawnz dar a ri e,  
 Chawotin lamthangin a au vel;  
 Chinlaiin lo ngai rawh u.

(Sawheng atanga Ratu kat leh dawna a phuahite)

1. A tlang tluanin Laldang tukram a ni e,  
 Hmanah zaleng di kan chhaina;  
 Ratupui kan hel leh e
2. Ratupui saw hmanah zaleng, suithlung kan  
 Kai leh nang e Lalthumluia p; [rualna  
 Hmarlang chena lawi ang kan thanna.

3. Chhawrtbla cbhimchhuak kaw! a êng rua! e,  
Ka dawn vawng vawng mi u nun nem;  
Khuan dima mual liam tawh hou.

**Ratu kai hnua a phuah hla dangte**

4. Tusichawng darin Lallai runpui a mawi e,  
Kuma tina Khuangpui buanthang;  
Kan tushna zai a sa e.
5. Lalchingkin pa lam khuangpui tush laiah  
Chiolai zawng hi Chawogzil ang au; (hian,  
Lianluau pa a haw thei lo.
6. Laldangan Khuangpui tush zai a rel leh e,  
Phulzing vangkhua a leng tawh hou;  
Lianluau pa kan ngai mang e.
7. Lensh Chhawkhei pâr a chul thin e,  
Chul lo tea no nghil nghiali;  
Hmar tlangpui mawi rengah e.
8. Ka dawn rua! rua! thin e ni chunah,  
Lawmlai Chawngpui ka then tur chu;  
Zunleng ngaiin ka tap e.
9. Kan sumtuel hi chhungkim dar ang kan  
Ka suihlung len vangin tlang tin; [lenna,  
Su dum duatin ka hmu e.
10. Kawingo lengin a di a au em ni le,  
Thlang hnawm a leng Lalkang lo nun;  
Ka di Laldang a ti e.

**ningsat khuaa an awm laia Nuthlawi pakhatin  
phuahna**

- A tlan ngaiin Pualhrangin Bung a tlan e,  
Laldang ngaih chu suihlung lam ang;  
A leng ngai kan leng leh e.
1. Haw rawh thiani, tlan tul dawn lovin,  
Thangtin chhuahtlang dawnlung chungah;  
I ngbak ang Laldanga chu.
  3. Min ngai ve rengin ka ring lo che,  
Kei zawng Laldang, tlanga ainawn,  
Sirte pâr iang ka ti che.
  4. Ka liam mawh e, dawnlung sai ang kan  
Kei zawng thiani, Laldang ngaiin; [ngirna,  
Ramtuan reng ka rel lo ve.

**A HLA DUHZAWNG (Buangkhaw zai a mi)**

1. Fiara tui hman Chunkil'n a chawi,  
Lamsial kawt dai an a luang chhuak.
2. Lamsialpui mah tangleiah in chbiah,  
Lungdi tangleiah chbiah a har mang e.
3. Tbliah lohvin Buangthei a hmin an ti,  
Zawl lohvin siali ka hlui ta e.

**Nilen Zaia a hla duhzawng ber pakhat chu**  
Tlai ni tla kai chiai e, raltiangoh thlir nuam ing e  
Mi u nunnem te zawng, biah zaia chbah nuam  
ing e.

Lalhleia hi fapa mala ni bawka, Mizokhaw-  
sak dan panggaiah kha chuan a hausa ve em

em a sawi a ni thin. Darbu tha tak tak te, Darkhuang te, Darmang te a nei a. tin, Silai pawh fung li fung nga chu a nei deuh reng thin a ni. Lel ziding leh Sailo ziktluak tak anih avangin Sailo dangte pawhin an zahder thiam hle thin. Khawthlang lal Savunga pawh khan "Kei leh hmara Lalhleia chauh hi Sai o ziding ngat chu kan ni e" a ti thin an ti. Tin Sorkar pawhin King George V Silver Jubilee ah khan khawthlang rorel that manah Tangkapi a pe ve a, Silver Jubilee mahni khua hman that manah chuan Silai a pe bawk a ni. Nupui lamah hian a vanduai a, a sun thin a; mahse, nupui pathum vel hi chu a neih deuh reng thin avang hian a fa neih zawng zawng te chu 30 vel ni awma hriat a ni a; tin, a fapate puitlin thlenga damte chu pakua an ni. Hengte hi :—

1. Thuamluaia 2. Hranglunga 3. Lalliang
4. Lalchingkina 5. Sa'loliana 6. Ngurliana
7. Lalchuanga 8. Lalzela 9. Lalluaha

## BUNG RIAINA

**THUAMLUAIA.** Thuamluaia hi Lalhleia fapa upa ber a ni a, Vailen tirha Hmuizawla an awm lai hian Sipai tam tak leh Tlangsam Sap ho chu an khuaah an rawn lut a, an riak a. Tawng inhriat chien lohna avangin Sipai ar leite leh an khuate chu an intibuai ta a, Sipai hote chuan khawlaia an mi hmuh apiangte chu

an vel nek zel ta mai a; an khuate chu an tien-darh ta hial a. Sap chuan lal lo kal sela inbia ila, Lal a lo kal lohva kan i. biak fel loh chuan in khua hi kan hal darh vek ang a, Lal pawn kan ban nghal ang an ti ta hi-l a. Chutih lai chuan a pa chu zu a lo nam deuh va, Thuamluaia chu a pa aiawia a kal ta a, upa dang tumahin an zui ngam lo va, Mangrawnga leh Rophunga chauhvvin an zui a ni. Sap nen chuan an va ir-be rem ta a. Hei hi khawtlang briat tham leh tangkai thamah chuan a pa ai a awh-na hmesa ber a ni.

A pa Lalhleia chu Hmuizawl atanga Sawleog a kai chhoh ruel khan Serzawl thlanga Tangkaburh an tih hmunah khuan Thuamluaia khua turin in 70 vel zet hi an pheii ta bawk a; mah-se, Thuamluaia chuan nupui a la neih loh bawk avangin, a khua turah chuan a la pheii ve mai thei lo va, a pa hnen lamah a kal ve rih zawk a. Kum 1901-ah khan Sailo lal Buangtheuva fanu Darthangpuii chu an khua Hmunpui atangin a nupuih an va neihsak ta a. Nupui a neih hnu chuan a khua tura indan ve chu a lo hun ta a; mahse, Borsapin a ram tura a pek Hmuizawl tlang dung leh Kelzam ramte hi a pheii em avangin chhuk a hreh dauh va, a pa hnenah chuan Darlawn ram neih a duh zawk thu a hriih ta a.

A pa pawh chuan Thuamluala huaisen avanga ram nei thei chauh vah a lo inruat hial thin avangin, a duhna hmun take a awm pawh chu a lo hnial duh bik ta lo va, Borsap an zu dil a, Borsap pawh chuan a lo remti a, 'I khuate Tangkaburha awm hi la chhuak la, Lalsake a'n ram a nei lo va, i ram duh loh hi ka pe dawn a ni" a lo ti ta a. A khuate chu a ko chho va, tuna Darlawn Bangla hmunah hian an awm ta a; 1902 ah chuan a va awp ta a ni Kum 1903-ah chuan a fapa upa ber Lalzama chu a lo piang a, tih, Sedawi a chhun a, hemi hmuna a awm lai hian Mitthirawp a lam ta bawh. Kum 5 an awm hnua chuan 1907-ah chuan Darlawn tlangpuiah an kai chho va, in 80 lai an tling ta a. A tlang a sangin a thengthaw bawh a, mi an dam thei a, buh leh bal a tam bawh a, an hlim em em thin a ni. Mizoram Borsap Major Cole pawhin, "He hmun hi a a boruak a tha a, a ram a nuam bawh si a, khawthar kai tawh lovin kumkhuaa in awmna turin buatsaih rawh u" a ti hial a ni. Hemi hmuna hian 1910-ah kban Se paliin khuang a chawi a, 1911-ah erawh chuan Sazuin buhte a sehin mau a rawn tam ta a. Darlawn tlangpui tek hi chuan an tuar nep viau mai a, an kiang hnei khuate pawhin pur chawh nan an rawn hmang nasa em em a ni. Chuvangin, buh chi tur pawh an khaw chhehvela mite hnenah chuan a semin an sem thei ta hial a ni.

Tin, 1911-ah bawh hian Manding Sap Col. Loch (Thentiauva) chuan Aizawl atanga Tim-paimukh chhun turin Lamlian a rawn zawng ta a, Lalho hnenah chuan mahni ram chhung theuh chu lai turin thu a pe a, lamlian enkawl zui turin Mel veng leh Bangla enkawl turin Awmpui siam theuh turin a ti bawh a. Tin, 1914-ah chuan Sawlengah a kai chho va, tah chuan Sedawi a chhun a; tin, Se pahuihin a Zankhuang bawh. 1917-ah chuan Borsap Col-qohun khan ram ri hranz a lo pe ve ta a ni. A ram chhung atana a pek chu a pa hminga lo awm sa Kepran tlang sang lai tak atangin Sailutar lui thlengin a ni a, chhak leh thlang zawng erawh chuan Tuivawl leh Tuitung inkar a ni. Tin, 1921-ah chuan Sawleng tlang sang laiah an insawn chho leh ta a, heta an awm lai hian fapa 5 leh fanu pakhat neih a nupui chuan a lo thihsan ta a ni.

Tin, tlang sanga an insawn chho hma kum 1918 ah khan Salvation Army Pu Kawlkhuma hote chu Aizawl atang te, Durtlang atang tein an rawn hnawt chhuak a, Lal dang tumahin an lo pawm ngam si lova, Sawleng khua hi an rawn thlang chho va. Thumluai a chuan a lo pawm ngam dawn leh dawn loh a pa a va rawn a, a pa chuan heti hian a lo chhang a "Pa-tianin a aiawh roreltu turin min ruat a, kan

khua leh tuite zingah chuan chitin hnamtin pawh an awm ang a, an sakhaw biak dan pawh a hrang anga, anni pawh hi Salvation an nih mai avang chuan, engmah kan pawm ngam lohna tur ka hre lo, i khuaah chuan lo awm tir rawh" a rawn ti a. Tichuan, Sawleng khuaah hian a awm tir ta a ni. An chakoa zawk nia an rin avangio veng hranga awm an dub e, Sawleng khaw hmun bluiah hian a hrangin an awm e, Biakin te an sa a, hei hi Salvation Army hmun khuar nghehna hmasa ber a ni.

A nupuiin a thihsan hnu chuan Thuamluaia chu a khua a harin a lung a leng em em thin a, a mitthi ngai chuan hlate a phuah a :

1. Sawltlang khanthum thinglen bu ngah lo fu  
Ka zawt ang che ka chung Kawingo, [e,  
Fam koh in thiam lawm ni le.

Tin, hetih lai vel bawh hian a fapa Lalzama chuan Sakei no a kap a, an ai a, a lung a leng em em a, he hla hi a phuah leh a :

2. Kawlkei zia tial mualah lame, Lalzam nu lo  
Haizang dar leh Lalenglina [tho leh la,  
Tahlai bang thei si lo ve.

Tin, Darthangpuii chu a nupa pa Tlungvel khaw lai Lalluaiva chuan Sialin a rawn thlaichhiab a (thisen a), chumi tuma upa lo kalte chuan he hla hi an rawn kalpui bawh a :



3. Rihchin tlangah zu au il<sup>u</sup>, thlafam hnu  
Lokir leh la, ka u Darpui, [lungher maw e,  
Hmuntlang chul hnu fang dun i.
4. Darlawng zopui lal lai puan ang kan zar na,  
Rawo fang che maw rauthla lengin,  
Ka u e Darpuiliani.

Thuamluaia hi mi'kawh<sup>u</sup>sen, ramvachal tak a  
ni a, sa 30 a kap a, Tumpang pawh pahnih a  
kap bawk. A hmel landan c<sup>u</sup> mitum ren rawo,  
in tipa kheikhawi hian a langsa ran mai a ni.  
A naute ho zingah chuan Ngurliana hian amah  
a chhun deuh bera a hriat avangin a ngaine  
em em a, thil kalbmang leh mihring khawsek  
dan turte hi a hrih a hrih thin a ni. June 20  
1940 ah khan kum 62 miin a thi ve ta. Kum  
40 ro a rela; a thih hnu chuan a fapa upa ber  
Lalzama'n a ai a aw<sup>u</sup> ta a ni. Thuamluaia hian  
fapa 7 leh fanu 3 a nei a, he lebkhabu kan  
ziak lai hian hetiang hi an hnathawh leh awm  
dan theuh a ni :

1. Lalzama, Sawlengah Branch Postmaster a ni.
2. Lalkailuia, Lo nei miin a awm.
3. Kaphrimo, Aizawl Borsap Pisaah C.I. hna  
a thawk.
4. Lalengliana, Assam Regiment-ah Naik-in a  
pension.
5. Laltinkhuma, Assam Regiment-ah Hon. Cap-  
tain in a pension.

6. Lalliauva, Lo nei miin a awm.

7. Bialzauva, Lo nei miin a awm.

**LALZAMA :** Lalzama hian a pa damlai chuan Darlawn khua hi a awp a, heta a awm lai hian Sial a chhune, a Zankhuang bawk a; tin, Tlang-phal turin Sepui a talh tel a, Mizo danin diar a tial ve a ni. Lalzama pian thu a puin a lo hriat chuan a lawm em em mai a, he bla hi a lo phuah a :

Kan chhun awn ruai ruai e Challian zing-

Kan ai bung bung Kawikei sabrang. (tiahah

Ngur apiang Lalzama e.

Thuamluaia hi a indan tirh laiin a pa hian Darbu a pe phal lo va, a fapa Lalzama lo pian hian a pu chu a lawm em em ani tih hriat a ni a, chung lei chuan an chhung zingah mpa an pian tlem em avangia Lalzama han piang chu a pu lawmna a sosang hle a ni. A lawm lai tak denchhen hian Thuamluaia chuan he bla nen hian a pa chu Darbu a va dil ta a.

Ka zua Laldang tiandar mi hian la,

Awih nuam ing e, tucahuan rengpui,

A ngurth Lalzama e. tih bla hi a pa hova zuhmuna an han sak, meuh chuan an Darbu zingah pawha an rohu bera an ngaih, Lallien-vunga'n Z-deng lai Lalchungnunga fapa a man kha, an rawn tlan chhuahna Haizang der chu a lo pe ta a ni. Hmanlai Mizo lalho ngaihden chuan he dar hi cheong sang mana an lo ngaih thin a ni.

**HRANGLUNGA CHANCHIN :** Hranglunga  
 i Lalhleia fapa pahnhna a ni a, Lallunga tia  
 ko hi a thiante zingah pawh an tam mai. A  
 u Thuamhnaia Darlawra a indan a tanga kum  
 lahnaah khan, a pa Lalhleia pawh khan Ratu  
 a zuan a, chumi kum vek chuan Hranglunga  
 pawh hi Hnahsep himunah sawn a indang ve e,  
 in 40 lai a indan pui a ni. Hnahsepah hian  
 kum li lai an awm a, chu mi chhung chuan Sial  
 a chhun a, Mitthi rawp a lam bawk a, tichuar,  
 lengtawng tlangpuiah khian a kai chho ta a ni.  
 Tengtawngah hian Khuang a chawi ve ta a ni.

Hranglunga hi palian tawh tak, mi ngo vak  
 lo, hang ngaihno bei tak a ni a, a zai dam em  
 em a, a nun a tlang bawk a, thenual ngaihnat  
 a blawh em em a ni. Thenual pawl a thiam  
 a, zuhmun han vawn vel dante a thiam em em  
 e, a pa ai pawhin zai a thiam a; tio, haphuah  
 a thiam em em bawk a ni. A khawdang vawn  
 thiamzia entir nau Tipaimukh lamhan saw an  
 lah chin tur Sorkarin khawtin a sem vek a. a  
 khua te chuan an lai zo hmesa ber a, Sorkarin  
 lawmman atan Silai a pe ta hial a ni. Chu  
 Silai chu a lo thlen ni chuan beti hian hla a  
 phuah a :

Hmarah ka zua, Lawntlangah Lalnghinglo-  
 Lai taka leng Sappui reng chhawn, [pa

In ka piang Laldanga e.

A han tlangval chhuak hlim chu a indan hma

hian a thiaute ho chuan nula pakhat tal ngai  
 ve se an ti em em mai a, mahse, mi zakzum  
 tek anih avangin an mangan pui hle thin a.  
 Vawi khat chu a thian'e ho chuan nula pakhat  
 chu an va thuthiam sak a, mahse, a blawh  
 chhem leh an bleuh avangin a thiante zinga  
 pakhet chuan nula chu a bawthluk sak ta mai  
 a, nula hnenah chuan "ti khan lo mu reng la,  
 lo tho reng reng suh ang che, kan va ko tang  
 e" a ti a, tichuan, an va ko ta a ni.

Vawi khat chu a upate nen a leikapuih hian  
 zu an khawn a, chutih lai tak chuan a kawta  
 Seluphanah chuan Rengchal hi a rawn fu a, a  
 kiu ta veng veng mai a, an lung a tileng hle  
 hlawn a ni ang chu, chu Rengchal hram chu  
 inpuah siak an rawt ta a, a thiam ber chuan  
 nopui vawithum in nawn rawh se an ti a. A  
 upate ho chuan an han bei hlawn theuh na-  
 chungin, han sak tlak meuhvin an puitlin thei  
 ta hlawn lo va, a tawpah chuan heti hian a  
 rawn puah chhuak ta a ni.

Lung tileng reng renga chung lelte,

Di a chhai e Lianluau pa sawogpui zârah;

Kan nun hlui puan ang ti thar leh thin.

A upate ho chuan thiam an ti ta khawp mai  
 a, cheng khat theuhvin zu an lei phah ta hial  
 zawk a ni. Hrangluoga hi a pain Khuangchawi  
 ve turin a duh a, a newr deuh fo mai a, a  
 Khuangchawina tur chuan Sechal pakhatin ten-

pui ve pawh a tum nghe nghe a. Chutia Khuangchawi tura a va nawr deuh chhen lai chuan, a pa awmna Ratu khuaa mi, fa pawh a va neihpuina, Saihnuaai chu a thi hlaub mai a, a sun em em a, a pan Khuangchawi tura a lo tirh chhen lai anih bawk si avang chuan a pa lo hriat atan he ti hian hla a phuah ta a :

1. Hmarah chun ngaiin a leng an ti,  
 Chung lelte leh brinbniang nau ang jah laiin;  
 Kei zawng Khuangpui lam ka rel thei lo.
2. Kan nghah par mawi kung a tang zarah,  
 Lelte a them reng e keimahni iangin.  
 Hmartianga Saihniangi ngai ing e,  
 a han ti ta a, he hla bi a pan a lo hriat chuan  
 "a ni tak e, kan lo hmanbmawh lu deuh zu  
 nia maw" a ti ve ta a ni.

Tin, a khuaah hian nula hmeltha tak mai Chawnglianthangi a awm a, chu chu heti hian a phuah bawk a :

1. Chan theih chang se ramloh lentu par mawiah,  
 Thangngo tum kawng bellei mualah to ila,  
 Min thliak dah law maw e nau lawmah.
2. Kan nghah Darhaiah a tling reng mai,  
 Chalki vario Thangngo thal rawh lai lai zu;  
 Lallai zu thlum zawng a nem duai mai.
3. Mi zawng zawng parah va to mah la,  
 Tawng khaw lenmawi Thangngo sensiar nuih  
 Chawnpui per mawiah i to awm e. [mawii  
 Saihnuaai nena an fapa Lalkiamlova pawh khan

a naupan lain a thibsan ve leh ta a. Hranglunga hien zubmun a tibblim thiam zia leh thenrual kawm a thiam zia chua thih hnu kum sawm laieh pawh a hla phuahte kha an sa ngem lo zawk hial thin a ni. An han sak châng pawh-in a thenrual bluite chu insum zo reng reng an awm thin lo va, an tap ta zawih zawih thin a, a pa pawh a tap ve hial thin a, hla sak buai thlak tak a tling fo thin a ri. A thiante ho sawi dan chuan mi huat zawnga a awm leh mi pawh a sawina reng reng an bre lo, “a nun a tlang tha em em a ni” an ti ringawt thin a ni. A pa nen hien an inhnaih bawk a, thubuai harsa deuh a khuate zinga a lo awm pawhin a rel sual loh nan a pa a va rawn zawk hial thin a ni. Zubmun hlafiam tam tak a phuah ve a, chungte chu kan han ziaak leng lo a ni. A hriselna a lo that tak loh avangin kum 1917-ah khan kum 37 miin a lo thi ve ta a ni. A thih chuan a u Thuamluaia pawh khan a sun nasa em em a, a lungleng chuan heti hian hlate a phuahe, zu hmuna han sak chângte hian a lo tap zawih zawih thin.

1. Changsialin ropui rel ile, hmanlai kan nun  
Fam khuaa leng Lallanluaupa; (ngai inge,  
Ko thiam in awm lawm ni le ?
2. Furkhua thiange, thel favangab, kawingo an lo  
Fam ngai zawng hi leng hmuna ita, [leng leh e,  
Lianluaupa kan tewng mahna.

3. Khua thal kawngo a lo lenge, lungualpui kan  
Leng za ila Ribchin tlangah [nuam mang e,  
Ka nau Laldang zu au vi.

Tio, Tlanglam zaiin heti hian a phuah bawk :  
Hmanah Lal nunnema thang tawh hnu,  
Tunah erawh thlafam kawl vel a deng e;  
Hmelma di rram tur a pawl ber mai.

Hranglunga hian fapa puitling pathum leh fanu  
pahni a nei :

1. Lalhulha, a pa thih hnuin a pa aiawhin a lai.
2. Lalbuliana, Mi themthiam a ni a, Carpenter hna a thawk.
3. Lallianluauva. Missionah Zirtirtu hna a thawk a, Primary Sikul Sorkarin an lak hnu pawhin a thawk zui zel a, a pension ta.

**LALLIANGA :** Lallianga hi Lalhleia fapa pathumna a ni a, mi nun tlang leh zaidam mi nun ngil tak a ni. A pa thihin ram hrang neiin a la awm ve lo va, a upa ber anih avangin a pa aiawhin a lai ta a ni. A rorel chhungin India Independence a lo ni a, Mizoram lai zawng zawng chu an lalna a lo tawp ta. A rorel chhung a rei lo bawk a, chanchin engmah a nei hman lo.

**LALCHINGKINA :** Lalhleia fapa palina a ni a, a pa thihna khua Buallawnah hian lo nei min a awm a, rambuai hnuab erawh chuan Sorkarin Ratu khuaah a sawikhawm ta a ni.

**SAILOLIANA :** Lalhleia fapa pangana a ni a, nupui nei lovin rei tak a leng a, a lo hrisel lo tial tial a, nupui nei lovin a thi ta.

**NGURLIANA :** Lalhleia fapa parukna-a ni a, January ni khet 1910-ah khih a piang. a. 1928 ah Middle English a pass a, 1931 ah Salvation Army Officer training-in Calcutta-ah a lut a, 1932 ah Sericulture Sikul, Melda-ah a lut leh a, final Exam-ah chuan pakhatna a ni a, tin, Mizo zinga Sericulture pass hmasa ber a ni bawh. Kum 1938 atang chuan Pu Kawlkhuma tanpuitu, District Helper-ah dah a ni a, 1945 ah khih Divisional Young Peoples Secretary atan ruat a ni a. Tin, Officer leh Officer te inkarah buaina chungchang thu bik atan a nupui Khuangchhungi nen 1947 atangin Territorial Headquarters chuan Court of Enquiry member atan an nupui a ruat a. Kum 1952 ah chuan Baktawng Middle Sikul Manager a ni a, 1956 atang chuan Pu Kawlkhuma a lo chawh dawh tak avangin Cachar leh Manipur District Officer a ni leh a, 1965 ah chuan International College for Officer, London ah a lut a, Mizoram a lo buai hnu khih Mizoram Sap awm a lo rem ta lo va, 1967 atang chuan Major Kennedy aiawhin Mizoram Divisional Commander atan dah a lo ni ta a. Tin, Mizoram hi Division hniha then a lo nih hoiin Eastern Division thar awp turin Thingsulthah ah dah a ni ta a,



chuta tang chuan kum 42 Officer hna a lo thawh hnuin a lo chawl (retired) ve ta a ni.

Ngurliana hi a pianphungah pawh mi rorum lam deuh a ni ve a, a naupan lai pawhin a pa chuan "Chhak leh thlang indo lai te khan Thuamluaia leh Ngurliana hi chuan kut ke lo nei hman ve tawh selá chuan ka rethei bik lo tur" a ti thin a ni. Assam Christian Council ah pawh Salvation Army aiawhin a kat thin a, tin, India Christian Council Shillong a an neih pawh khan Salvation Army aiawh tura tirh a ni. Ngurliana hian fapa 3 leh fanu 5 a nei. A fapa upa ber Dawngliana chu Bombay Willson College ah B A a pass hnuin Sipaiah a lut a, tuah chuan Lt Colonel niin Commandant a kai ta. Infiam mi a ni a, Cups 21 leh Medal 2 len Certificate tam tak a la. A fapa pahuibna Relliana chuan Sorkarah Motor Driver hna a thawk a; tin, Pawliana a fapa pathu na chuan Sorkarah Office Peon hna a thawk.

**LALCHUANGA :** hi Lalhleia fapa pasaribna a ni a; mi taima tak a nia, hlo thlo miin a awm 1931 ah khan Salvation Army Social Centre, Calcutta ah a zu thawk a, Officer train ve turin an duh hle a, mahse, a tuina zawng anih loh avangin; Ratuah lo nei mia awm a thlang ta zawk a ni. Ratu khuah chuan Mizo Union bruaite zinga pakhat a ni ve reng a Union nawrh lai khan Lung iaah a tang ve a,

District Council hnuaiah pawh mipui rin zawng tak anih avangin khawtlang hotute zingah a tel ve reng a ni. Fapa 6 leh fanu 3 a nei. A fapa pakhatin Salvation Army Officer hna a thawk a, mi dang zawng chuan Sorkar hna an thawk vek a ni.

P.C. Party rorel lai khan Ratu Canstituency chhunge nula hmeltha thlanna an siam a, Lalzela fanu naupang ber Lalchuailevi B.A. chu hmeltha bera thlan a ni a, chuta tang chuan Ratu khaw hausa Mena & Sons te chuan Ratu leh Aizawl inkara an Bus tlan thin chu "Hmeltha bawm" an vuah ta a, tun thlang pawhin chu hming chu a la pu zel a ni.

**LALZELA :** Hi Lalhleia fapa pariatna a ni a, Middle a pass hnuin 1941-ah khan Salvation Army Officer Training-ah a lut a, Officer hna rei tak a thawh hnuin a chawlh san ta a, Ratu khuaah Branch Post Master hna a thawk ta, Fapa pahnih leh fanu 4 a nei a. Kum 30 lai Branch Post Master a thawh hnuin 1984 October 9th. (Tuesday) zing dar 11-ah India hmarchhak a Postal Staff zawng zawng zinga hosthawh that ber lawmman National Award Delhi-ah pek a ni a. A fapa upa zawk chuan Sumdawn-na leh in lam enkawlna a thawk a, a fapa naupang zawk chuan M.A. a pass hnuin Dar-lawa High School ah a thawk.

Salvation Army Officer hna a chawhhsan  
hnu pawhin Local Officer hna chu tun thlengin  
a la chelh zui zel a ni.

**LALLUAHA:** hi Lalhleia fapa pakuana a ni a,  
fa tlum ber a ni bawk a, inpui luahtu, pa  
rokhawmtu ber a ni. A pa thih hnu rei lote  
atang chuan mahni in atangin Vaitawng te a  
zir a, a sumdawng ve ta nghal a, Dawr a siam  
a. a khawsa thei hle zel a ni. District Council  
hnuaiah pawh khan Village Council President-ah  
thlan a ni thin. Mi nun ngil tak, mi retheite  
khawngaihna ngah mi tak a ni a. A fapa upa  
ber chu Sikul Zirtirtu a ni.

Lalhleia fanute zinga pasarih chuan Lal, tlang-  
nei thiau pasal an nei.

Hengte hi :

1. Lalrosemi (Buitei) chuan Phaileng lal Lal-  
savunga a nei.
2. Lalhangvungi (Theri) chuan Serzawl lal Lal-  
sakeia a nei.
3. Thuampuii chuan Khawrublian lal Khaw-  
zadala a nei.
4. Roziki chuan Mualpheng lal Hrangkunga a  
nei.
5. Saikungi chuan Khawlek lal Hrangchhunga  
a nei.

6. Thangpuh chuan Hmuizawl lat Lamhira a nei.  
 7. Sailorili chuan Serzawl lat Lalsakeia fapa  
 Lalzuala a nei. A pa<sup>th</sup> thih hnu hiah a pa  
 aiawhin an lat hman a ni.

ooOoo

IZORAM STATE LIBRARY  
 No \_\_\_\_\_  
 Acc. by \_\_\_\_\_  
 Class by \_\_\_\_\_  
 Date \_\_\_\_\_  
 Author \_\_\_\_\_  
 Transl. \_\_\_\_\_  
 Date of purchase \_\_\_\_\_